

1 Korin

Korin nin Yesuyen alya bereya hitte Pol belej hanƙapya asan kayyin

¹ Ne Polbe Al Kurun belej dufayminde po Yesu Kristuyen mere basan al aposel hiyyen yen hoy niryin. Ningeb meten kadinin Sostenesya neya belej ² den Korin taunde nin Yesu Kristuyen alya bereya sios Al Kurun belej doyan dirde hi goya Doyan Al Kuruninin Yesu Kristu dolon irde han mar megen hike kwa kurun goya goyen goke asan gago kan har. Den Korin nin siosbe Yesu Kristu nin dufaytin sanin irke Al Kurun belej yen ge ten hoyan mun dapat dirtin han. Irde wukken wor po yiren yen hoy dirtin yen han. Yesu Kristube yen dolon irde han mar megen hike kwa kurun goya nenyat Doyan Al Kurun.

³ Ningeb Adoninin Al Kurunya Doyan Al Kurun Yesu Kristuya belej bunin dirde igin igin dirde bitin yisikamke igin hiwon yen nurde har.

Pol belej Korin nin Yesuyen alya bereya nin Al Kurun igin nurd unyin

⁴ Be, denbe Yesu Kristuya han geb, Al Kurun belej bunin dirde igin igin dirde hi. Ningeb goke ten hugin Al Kurun igin wor po nurd unen himyen. ⁵⁻⁶ Al Kurun igin nurd unen himyen gote min kurabe gahade: nen belej Yesu Kristu nin tagaltekeb mere go nurdeb bitinde

tarej hitij hanj gwahade goyen po, denj goyen Yesu Kristuya hikeb mere tenj tenya saba fudinde bebak tenj tenya kurunj gobe iginj mat wor po titek po dirtinyen hanj. ⁷ Gwahade ninjeb Doyanj Al Kurunjinij Yesu Kristu sopte mulganj henj wawonj wor po yenj nurde goke doyanj henya Holi Spiritiyen tarej kawan forok yenj yenj mata goyen tumnanj yawartinj ala hanj. ⁸ Denj gwahade gobe Al Kurunj belenj saninj dirde hike kunj kunj nalu funanj forok yiyyenj. Gogab nalu funanj Yesu Kristu wanj wanj goyenterbe ultinje merem monj hinayinj. ⁹ Ninjeb nenj belenj Urminj Doyanj Al Kurunjinij Yesu Kristuya awalikde hinayinj yenj hoy diryinj al Al Kurunje yenj ge hekkej nurtek al hi.

Yesuyen alya bereya bana bipti forok yaminj

¹⁰ Be, kadne yago, denj tumnanj kadom mohonde tenj tenj mata ma tenj hinayinj. Mere tenj hinayinj kurunj goyen banabe dufay unjkurenj po kerde mere tenj hinayinj yenj gago Doyanj Al Kurunjinij Yesu Kristuyen denjemde dinenj hime. Monjo gwaha ma tinayinje denj hanj bana gonj kadom kilon gird tenj hikeb bipti forok yenayinj. Ninjeb bada henj bitinya dufaytinya unjkurenj po kerde awalikde po hinayinj. ¹¹ Kadne yago, ne ga dinenj hime gabe al kura Kloeya hanjen mar kura gore wanje dindikenj ulinj dufay budam yerde kadom mohonde tenj hanjen goke momonj niranj geb, gago dinenj hime. ¹² Denj hanj bana gonj ninj al kurabe, “Nenje Polyen saba gama irde hite,” yenj hanj. Kurabe, “Apolosyen saba gama irde hite,”

yeŋ haŋ. Irde kuratiŋbe, “Pitayen* saba gama irde hite,” munan kurabe, “Yesu Kristuyen saba gama irde hite,” yeŋ haŋ. ¹³ Daniŋ gwaha teŋ haŋ? Yesu Kristube walkaka irde hoyan hoyan irtiŋ geb, gogo teŋ haŋ? Ne Pol gare deŋ ge teŋ kuruse hende kammiriŋ? Irde ne Polyen tarende baptais tamiŋ? Moŋ, gwahade moŋ!

¹⁴ Deŋ belen mata gwahade teŋ haŋ go nurdeb ne belen haŋkapa Krispusya Gaiusya po baptais yirdeb deŋ kurabe baptais ma dirmiriŋ goke Al Kurun igiŋ wor po nurd unen hime. ¹⁵ Niŋgeb deŋ belen epte ma, “Neŋbe Polyen tarende baptais titiriŋ,” yenayiŋ. ¹⁶ Fudinde, Stefanasya yeŋya hanŋen mar goyen wor baptais yirmiriŋ yeŋ nurde hime. Munan al hoyanbe gwaha yirmiriŋ yeŋ ma nurde hime. ¹⁷ Yesu Kristu belen nad nerke deŋ hitte kumiriŋ gobe al baptais yird yird niŋ ma kumiriŋ. Gwahade yarabe yeŋ ge yitiŋ mere igiŋ goyen tagal tagal niŋ kumiriŋ. Kuŋ tagalde henŋabe moŋgo Yesu Kristu kuruse hende kamyiŋ gote saŋiŋbe hubu hiyyenkek yeŋbe megen niŋ alyen dufay wukkeŋ yeŋ hanŋen goyen ma gama irde tagalde hinhem.

Yesu Kristube Al Kurunŋen tareŋya dufay wukkeŋya miŋyaŋ

¹⁸ Be, Yesu kuruse hende kamyiŋ gote merebe megen niŋ alyen dufay gama irde kame kak alare kutek marbe kukuwamŋen nurde haŋ. Goyen-poga neŋ Al Kurun belen dumulgaŋ titiŋ marbe mere gobe mataniniŋ gergeŋ ird ird tareŋ miŋyaŋ

* **1:12:** Deŋem hoyanbe Sifas.

yeŋ nurde hite. ¹⁹ Kukuwamŋeŋ nurde haŋ mar gokeb Al Kurunyen asanđe mere gahade katiŋ hi: “Al kura, ‘Neŋbe megen niŋ dufay wukkekniniŋ yaŋ,’ yeŋ haŋ marte dufay wukkeek goyen gwamuŋ yureŋ.

Irde ‘Keŋkela bebak teŋ teŋ saŋiŋniniŋ yaŋ,’ yeŋ haŋ marte bebak teŋ teŋ tareŋ goyen teŋ siŋa ireŋ,” yitiŋ hi. *Aisaia 29:14*

²⁰ Niŋgeb megen niŋ dufay wukkeek miŋyaŋ albe Al Kurun diliŋde meten iŋiŋ dahade teŋ haŋ? Saba teŋ teŋ marbe Al Kurun diliŋde meten iŋiŋ dahade teŋ haŋ? Irde gayenter dufay gergeŋ forok yirde al biŋ yawarde haŋ marbe Al Kurun diliŋde meten iŋiŋ dahade teŋ haŋ? Hubu wor po! Al Kurun beleŋ megen niŋ alyen dufay wukkeek yeŋ hanyen goyen kukuwamŋeŋ wor po iryiŋ. ²¹ Niŋgeb megen niŋ alyen dufay go gama irde haŋ marbe epte ma Al Kurun nurd untek yiryiŋ gobe Al Kurun beleŋ dufaymiŋ wukkeek kerde gogo gwahade yiryiŋ. Irde mere tagal-tekeb megen niŋ al beleŋ mere kukuwamŋeŋ yeŋ hanyen goyen al kura beleŋ mereniniŋ goyen nurde Yesu Kristu niŋ dufaymiŋ tareŋ irnayiŋ marbe yad yad niŋ Al Kurun beleŋ amanen nurde dufay gogo kiryiŋ.

²² Yuda marbe mata tiŋeŋ Al Kurun beleŋ po ga irtek goke po naŋkeneŋ haŋ. Grik marbe megen niŋ alyen dufay wukkeek goke po naŋkeneŋ haŋ. ²³ Gega neŋbe Yesu Kristu kuruse hende kamiŋiŋ goke po tagalde hite. Goyenbe Yuda marbe Mesaiabe gwahade mat ma kamiŋeŋ yeŋ nurde hanyen geb, gwahade nurde hanyen gore Yesu Kristu niŋ yitiŋ mere goyen bebak teŋ

tenj belneñ pet tike mata bulunde katenj hañ. Irde Yuda mar moñ al miñ hoyañbe Yesu Kristu niñ yitiñ mere gobe kukuwamneñ nurde hañ. ²⁴ Goyenpoga al kura Al Kurunj belenj basiña yirtin marbe Yesu Kristu belen Al Kurunjen sanjnya dufay wukkeky goyen kawan yiryin yen nurde hañ. Yuda mar kura Al Kurunj belenj basiña yiryin marbe gwahade nurde hañ. Al miñ hoyañ Yuda mar moñ goyen Al Kurunj belenj basiña yirtin mar wor gwahade po nurde hañ. ²⁵ Megen niñ marbe Yesu kuruse hende kamyin gobe Al Kurunjen dufay po gama irde gogo tiyyin mere goyen nurdeb Al Kurunjen dufay gobe kukuwamneñ yen nurde hañ. Gega Al Kurunjen dufaybe alyen dufay gote folek geb, gogo Yesu kuruse hende kamde Al Kurunjen dufay wukke goyen kawan iryin. Megen niñ marbe Al Kurunjen tareñbe kurunj moñ geb Yesu keneñ unañ tike kuruse hende kamyin gogo yen nurde hañ. Gega Al Kurunjen tareñbe alyen sanj gote folek geb, gogo Yesu kuruse hende kamyin gega sopte isañ heñ tareñminj kawan iryin.

²⁶ Be, kadne yago, hañkapy Al Kurunj belenj hoy ma diryinyabe megen niñ marte diliñdeb dahade hinhan goke dufay henañ ko. Deñ dunjurenj dunjurenj po ga megen niñ alyen dufay wukke yen hanjen go minyanj hinhan. Irde deñ bana gonbe al denem yanbe budam ma hinhan. Doyañ mar wor budam moñ. ²⁷ Goyenpoga Al Kurunbe megen niñ alyen dufay wukke goyen gonininj yan yen hañ mar memya henañ yenbe dufay go minmoñ mar basiña yiryin. Irde al tareñnininj

yaŋ yeŋ haŋ mar memya henaŋ yeŋbe saŋiŋ miŋmoŋ mar basaŋa yiryiŋ. ²⁸ Irde megen niŋ mar beleŋ al kura gogo yeŋ ma yeneŋ hanyen irde al denem moŋ yineŋ hanyen mar goyen Al Kurun beleŋ basaŋa yiryiŋ. Al Kurunbe megen niŋ mar beleŋ det kurun yeŋ nurde haŋ det gobe gwamuŋ yurde det titmiŋeŋ yeŋ nurde haŋ det gobe basaŋa yiryiŋ. ²⁹ Gogab al kura beleŋ epte ma Al Kurun diliŋde yiŋgeŋ ge turun turun teŋ hinayiŋ. ³⁰ Goyenpoga deŋbe Al Kurun beleŋ basaŋa diriŋgeŋ, Yesu Kristuya haŋ. Yesu Kristube dufay wukkeŋ Al Kurun hitte mat watiŋ gote miŋ al heŋbe dufay wukkeŋ duneŋ hi. Yeŋbe gwahade geb, neŋ gayen dufay wukkeŋ go duneŋbe mata buluŋde mat dumulgaŋ tiye yeŋ nende gasuŋ teŋ kamiŋ. Irde Al Kurun diliŋde al huwak, irde wukkeŋ wor po diriŋgeŋ. ³¹ Niŋgeb goke teŋ Al Kurunyen asaŋde gahade katiŋ hi:

“Al kura yiŋgeŋ ge turun turun tiye yeŋbe Doyan Al Kurun po ga turun iryen,” yitiŋ. *Yeremaia 9:24*

2

¹ Be, kadne yago, haŋkapa den hitte kuŋ gor heŋyabe Al Kurunyen dufay banare hinhin goyen kawan irde momoŋ dirde hinhem. Gwaha dirde heŋyabe mere al beleŋ hapek yaŋ nurtek mat ma momoŋ dirde hinhem. Irde megen niŋ alyen dufay wukkeŋ yeŋ hanyen go hende huwarde ma momoŋ dirde hinhem. ² Go dirde hinhem gobe denya heŋya det hoyan hoyan niŋ ma nuren, Yesu Kristu niŋ po nuren, irde yeŋ kuruse hende kamiŋ goke po nuren yeŋ dufay

heñ hinhem geb, gogo dirde hinhem. ³ Ne denya hinhetyabe Al Kurunyen metenbe kurun geb, nigen tareñner epte moñ yeñ nurde hinhem. Irde moñgo metenmin bulun ireñ yeñbe kafura heñ barbar wor po yeñ hinhem. ⁴ Ningeb Al Kurunyen mere tagalde saba dirde heñyabe megen nin alyen dufay wukkek, kirminñin de hapek yan nurtek goyen gama irde ma tagalde hinhem. Gwaha titñenbe Holi Spirityen sanñin de meten ten himeke gote igineñ kawan forok yeñ hinhan. ⁵ Go ten hinhem gobe dufaytin Yesu nin tareñ iramin goyen megen nin alyen dufay wukkek yeñ hanñen go hende moñ Al Kurunyen tareñ de dufayninin sanñin irtirin yeñ nurnayin yeñbe gogo Holi Spirityen tareñ de meten ten hinhem.

Dufay wukkekbe Holi Spirit beñ duney hi

⁶ Be, neñ Al Kurunyen mere tagal tagal marbe Yesu gama ird ird matare parguwak yara hitin mar goya heñ Al Kurunyen dufay wukkek goke saba tagalde hite. Goyenbe megen nin alyen dufay wukkek yeñ hanñen go hende ma tagalde hite. Irde megen nin doyan mar kame hubu henayin gote dufay wukkek yeñ hanñen go hende huwarde ma tagalde hite. ⁷ Gwaha titñenbe Al Kurunyen dufay wukkek banare hitin bebak titek moñ goyen tagalde hite. Al Kurunyen dufay wukkek gobe kame nalu funande denñinin turnun yan heñ heñ ge Al Kurun beñ hanñapya wor po megen ga forok ma yekeya ep irin go goyen. ⁸ Dufaymin wukkek gobe megen nin doyan mar beñ bebak ma tiyamin. Bebak tiyamin manhan Doyan Al Kurun tareñmin

turɲuɲ yaɲ wor po goyen kuruse hende ma mayke kamwoɲ. ⁹ Goyenbe go mar gore gwaha tinayin yeɲbe bikkeɲ Al Kurunyen asanɲdeb gahade katiɲ:

“Al Kurun belen yeɲ ge amanen nurd unen han mar nin det gitik ten yunyin gobe megen nin marbe dilinge ma kennayin, kirminde ma nurnayin, irde epte ma det go forok yenayin yeɲ nurde hinayin,” yitin hi. *Aisaia 64:4*

¹⁰ Goyenbe neɲ hittebe Al Kurun belen Holi Spirit inke det goyen dikala diryin. Holi Spiritbe det tumɲan yenen keɲkela nurde bebak ten hiyen. Al Kurunyen dufay banare wor po hi goyen manan keɲkela nurde bebak ten hiyen geb, gogo Al Kurun belen inke neɲ hitte wan dikala diryin. ¹¹ Be, ganun al belenbe kadomde dufay goyen epte kenen bebak tiyyen? Hubu wor po. Al goyen yingen po gab dufaymin goyen nurde hiyen. Gwahade goyen po, al kura belen Al Kurunyen dufay epte ma nuryen. Al Kurunyen dufaybe Holi Spirit po gab nurde hiyen. ¹² Neɲbe megen nin mar belen dufay hen han gwahade ma dufay hen hite. Gwahade yarabe da detbe Al Kurun belen murungem mon dulin duntin goyen bebak tinayin yeɲbe Holi Spirit Al Kurun hitte mat watin go po gab neɲ hitte hi. ¹³ Niɲgeb mere tagalde hite gobe megen nin alyen dufay wukkeɲ yeɲ hanjen go hende huwarde ma tagalde hite. Gwaha titnenbe Holi Spirit belen saba dirtin go hende huwarde tagalde hite. Niɲgeb mere fudinde Holi Spirit belen yitin goyen Holi Spirityen yufuk

bana hañ mar goyen nurde bebak tinayin yey momon yirde hite. ¹⁴ Gega al kura Holi Spirityen yufuk bana ma heñ megen nin dufay po gama irde hañ marbe mataya mereya Holi Spirit belen forok yirde hi goyen epte ma yenen bebak ten kukuwamnen po nurde hinayin. Niñgeb mel gobe mataya mereya Holi Spirit belen forok yirde hi goyen ma yade hañ. Gobe Holi Spirityen yufukde hañ mar belen po gab yenen bebak ten hañ geb, gago dinen hime. ¹⁵ Goyenbe Holi Spirit yufuk bana hi albe mataya mereya kurun goyen igin ma bulun goyen igin yenen bebak ten hiyen. Gega al gobe al mali hoyan kura belen epte ma al igin ma bulun innayin. ¹⁶ Gokeb Al Kurunyen asande gahade katin hi:

“Ganun al belen Doyan Al Kurunyen dufay kenen bebak ten hi? Hubu wor po.

Ganun al belen igin saba iryen? Epte mon,” yitin.

Aisaia 40:13

Goyenpoga nenbe Yesu Kristuyen dufay kenen bebak ten hite.

3

Yesuyen alya bereya yingen ulin fitfut tiyamin goke yirin

¹ Be, kadne yago, denya hinhemyabe den goyen bitinde Holi Spirit belen sanin meten ten hi yey ma denen hinhem. Dufaytinbe Yesu Kristu nin taren iramin gega, bitin banabe megen nin dufay belen po kurun hike denenbe dirin muknen dufaymin hako po hañ goyen saba yirtin yara dirde hinhem. ² Dirin muknenbe binje taren epte ma

netek geb, mamu po nene hanjen. Niñgeb den wor gwahade goyen denenbe saba sanjñ ma dirde hinhem. Gayenter wor bikkeñ hinhan gwahade po hañ. ³ Gobe bitij banabe megen niñ dufay po kuruj hi geb, gwahade po hañ. Ga dinen hime gabe den bana goñ kadtij igij mat hike yenenbe goke bitij ar yeñ hi, irde kadom mohonde teñ hañ geb, gago dinen hime. Den mata gwaha teñ hañ gobe bitij bana megen niñ dufay po kuruj hi geb, mata gogo teñ hañ. Holi Spirit miñmoñ marte mata gama irde hañ geb, gogo teñ hañ. ⁴ Ga dinen hime gabe kuratij belej, “Neñbe Polyen saba gama irde hite,” yeñ hañ, irde kura belej, “Neñbe Apolosyen saba gama irde hite,” yeñ hañ gobe Holi Spirit miñmoñ marte mata geb, gogo megen niñ marte mata po teñ hañ dinen hime. ⁵ Metenðerebe Al Kuruj belej hoyañ hoyañ dunyij. Niñgeb Apolosbe ganuj? Irde Polbe ganuj? Deyyabe tumñañ Al Kurujyen meten mar ulij po. Niñgeb den ge meten tiyyekeb gogo Yesu niñ dufaytij taren iramiñ. ⁶ Gwahade geb ne Polbe det muyken tur irtij yara den bitij bana Al Kurujyen mere goyen kirmirin. Irkeb Apolos belej Al Kurujyen mere go kuruj hiyyen yeñbe det hartij go fe yunen doyañ yirde hañ yara doyañ irde hinhin. Goyenbe det hartij go forok irde kuruj ird ird albe Al Kuruj, yeñ unñkuren po. ⁷ Niñgeb Al Kurujyen mere al binde tur ird ird alya mere go fe unen doyañ ird ird alyabe turuj yirtek moñ. Mere go kuruj ird ird al Al Kuruj yeñ muñ po gab turuj irtek. ⁸ Munañ Al Kurujyen mere al binde hard hard alya mere go

kurunj henj henj ge doyanj ird ird alya gote metenbe hoyanj hoyanj monj. Al Kurunj dilindeb unjkurenj po. Goyenbe metenj nende gigen yuntinj gote murungembe kame metenminj gote iginej dahade forok yitinj goyen yenej gab murungem gwahade po yunyenj. ⁹ Fudinde, neya Apolosyabe tumnanj Al Kurunj ninj tenj metenj tenj har. Munanj denjbe Al Kurunyen binje metenj yara. Irde Al Kurunyen ya balem go gwahade goyen.

¹⁰ Be, Al Kurunj belenj buninej dirde iginj iginj diryinj geb, al kura ya ird ird mata nurde pasi hitinj al gore kenkela po tola yimiyyenj gwahade yara nebe denj hitte kunj Yesuyen alya bereya sios forok ird ird metenj minj urmirinj. Irkeb al hoyanj belenj metenj timirinj go hende sios forok irde hanj. Mata gobe tola yimiytinj go hende al hoyanj belenj ya irde hanj go gwahade goyen. Goyenbe tola yimiytinj go hende ya irde hanj marbe daha mat ya go irde hanj goke kenkela nurde ga irde hinayinj. ¹¹ Tola tarej hanjkapya timiytinj tola gobe Yesu Kristu. Ningeb al kura tola hoyanj kura sopte ma yimiyyenj. ¹² Yesu Kristu hitte mat sios forok irde hanj marte metenminj kurabe iginj wor po, kurabe iginj wor po monj. Gobe al belenj ya yirtinj yara. Al kurabe gol, kurabe silwa, kurabe hora damum hende wor po yade ya yirnayinj. Irde al kurabe he, kurabe yamunj, kurabe hunj belenj po ya yirnayinj. ¹³ Irde kunj kunj al iginja bulunya pota yird yird nalu funanj forok yeke ya yirtinj go kak belenj kumga tike gab ya yirtinj mar bana ganunyen metenbe iginj, munanj ganunyen metenbe iginj wor po monj goyen kawan

forok yiyyen. ¹⁴ Kak belen kumba tiyyen gega, ya daminbe sanin hiyyen gobe ya go iryin albe gote murungem tiyyen. ¹⁵ Munan ya go humga kukeb ya go iryin al gote murungembe hubu geb, bin misin nuryen. Yingenbe Al Kurun belen ten gasunminde kiryen. Gega al gobe yamin humga kuke detmin tumnan ya binde yubul ten busa-harde ulin ulin po hiyen go gwahade metenmin gote murungembe hubu wor po hiyyen.

Yesuyen alya bereyabe Al Kurunyen ya balem

¹⁶ Be, den Yesuyen alya bereyabe Al Kurunyen ya balem, irde Holi Spirit den bana hi goyen ma nurde han? ¹⁷ Al Kurunyen yabe balem wor po, irde denbe ya balem gogo geb, al kura belen Al Kurunyen ya go bulun iryenbe Al Kurun belen al go gwamuɗ uyen.

Megen nin alyen dufay wukkek yen hanyen gobe Al Kurun dilinde det dirnen wor po

¹⁸ Be, denbe dindiken usi ma yirde hinayin. Ningeb den han bana al kura belen yingen ge yenbe, “Nebe megen nin alyen dilinde dufay wukkek minyan al yen nenen han,” yen nurde hi kenem dufay go tubul po tiyyen. Gwaha ten hike megen nin mar belen kukuwamnen kenen hinayin gega, Al Kurunbe dufay wukkek minyan yen kinyen. ¹⁹ Megen nin alyen dufay wukkek yen hanyen gobe Al Kurun dilinde kukuwamnen kenen hiyen geb, gogo Al Kurunyen dufay wukkek gama irde hiyen al gobe dufay wukkek fudinde go minyan yen kinyen. Goke tenbe Al Kurunyen asande gahade katin hi:

“Al kura, ‘Nenbe megen nin alyen dufay wukkek goninin yan,’ yen han marbe

Al Kurun belen dufaymin tigiri tikeb yingen go po bulun yirde hi,” yitin. *Yop 5:13*

²⁰ Irdeb sopte mere kura katinbe gahade:

“Doyan Al Kurunbe megen nin alyen dufay wukkek yen hanjen gobe gote iginen minmon yen nurde hi,” yitin hi. *Tikin 94:11*

²¹ Ningeb denbe al kura turun irde, “Nenbe al goyen gama irde hite,” ma yen hinayin. Det tumnanbe dende geb, gago momon dirde hime. ²² Ne Polya Apolosya Pitayabe tumnan den Yesuyen alya bereyat meten mar. Megeñ ga manan dende megeñ. Irde heñ henya kamde kamdeya, det han ka han gaya kame hinayin goya kurun gobe tumnan dende. ²³ Irde denbe Yesu Kristuyen alya bereya. Irde Yesu Kristube Al Kurunyen.

4

Yesu Kristuyen mere basan mar

¹ Be, gwahade ningeb, denbe neñ gayen Yesu Kristuyen meten mar, irde Al Kurun belen dufaymin banare hitin goyen kawan ird ird meten yuntin mar yen denen hinayin. ² Goyenbe neñ Yesuyen meten mar belen titek mata kurabe Al Kurun belen meten duntin goyen binininde mat fudinde wor po kenkela meten titek go goyen. ³ Goyenpoga meten go ten henyabe den belen daw ma al hoyan belen daw metenneya mataneya goke igin ma bulun ninnayin goke kanduknen ma nurde himyen. Nigen wor metenneya mataneya

goyen igiñ wet ma buluñ wet goyen goke ma yeñ himyen. ⁴ Ne benerbe metenya mataya teñ hime kurun gobe igiñ ala po teñ hime yeñ nurde himyen. Gega Al Kurun diliñdebe buluñne kuram moñ ma yewen. Al Kurun yeñ unjkuren gore po gab igiñ teñ hime ma buluñ teñ hime goyen momoñ niryen. ⁵ Niñgeb meten marminde metenya mataya goyen igiñ ma buluñ yinen yinen nalube hako hi geb, aran po gwaha ma yinen hinayin. Nalu funande gab Doyan Al Kurun belen wan gwaha yinyen geb, gayenter den belen gwaha ma yinen hinayin. Goyenter gab Doyan Al Kurun belen alyen mataya metenya kidoma bana hike epte ma kenkela yentek yara goyen kawan ird ird hulsi teñ wayyen. Irdeb al binde dufay kerde hitin goyen wor kawan iryen. Irke gab Al Kurun belen meten marmin nende gigen meten titin gote murun gem yunen turun yiryen.

⁶ Be, kadne yago, saba dirhem gayen den belen nurde kenkela bebak tinañ yenbe neya Apolosyat ulderer mere gago teñ hime. Gogab den belen neya Apolosyat mata kenenbe, “Al Kurunyen asande katin go po gama irde hinayin. Mere hoyan gor ma han gobe gama ma irde hinayin,” yeñ han yen gote min nurnayin. Gwaha tinayinbe al kura gama ird ird goke yingen turun turun tenbe al hoyanbe buluñ mat tagal unen unen mata go ma teñ hinayin. ⁷ Goyenpoga dindigen ge yeñ nenbe igiñ yeñ nurdeb al hoyanbe buluñ yinen yinen tarenbe ganun belen dunkeb gogo teñ han? Det budam den hitte han kurun gobe Al Kurun belen ma duntin? Goyenbe daniñ Al

Kuruṅ beṅ ma duntin yeṅ nurdeb dindiken ge turuṅ turuṅ teṅ haṅ?

⁸ Be, deṅbe Al Kuruṅyen saba ninṅ binṅge kamtiṅeṅ teṅ hinhan goyen bikkeṅ tumṅaṅ nurde pasi hitin yeṅ nurde haṅ. Irde al kura horam yaṅ beṅ det kuraṅ ma nurde haṅ yara Holi Spirityen tareṅbe bikkeṅ titinṅ gogo ep yeṅ nurde haṅ. Irde doyaṅ mar karkuwaṅ hitin yeṅ nurde haṅ, irdeb neṅ Yesuyen mere basaṅ mar gayenbe deṅem miṅmoṅ yeṅ nurd duney haṅ. Goyenbe deṅ goyen gwahade hetek nalube hako po hi. Yesu Kristu sopte mulgaṅ heṅ waṅ waṅ nalure gab alya bereyaminṅ gobe doyaṅ mar karkuwaṅ henayinṅ. Niṅgeb fudinde wor po, deṅ goyen doyaṅ mar karkuwaṅ hewoṅ yeṅ nurde hime. Gogab neṅ wor deṅya tumṅaṅ doyaṅ mar karkuwaṅ hiniṅ. ⁹ Gega gayenter neṅ Yesuyen mere basaṅ marbe al kura mata buluṅ wor po tike al buda kuruṅ diliṅde gasa yirke kamtek marte gasunde gor deṅ ge teṅ Al Kuruṅ beṅ dirtinṅ yara nurde hime. Niṅgeb alya bereya meṅeṅ haṅ kuruṅ goya Al Kuruṅyen miyoṅya tumṅaṅ neṅ hitte kanduk dahade forok yenayinṅ yeṅ deney haṅ. ¹⁰ Gwahade niṅgeb, neṅbe Yesu Kristu ninṅ teṅbe kukuwa hite, munaṅ deṅbe Yesu Kristuya heṅbe dufay wukkeṅ miṅyaṅ haṅ. Irde neṅbe yulkek hite, munaṅ deṅbe saṅiṅtinṅ yaṅ. Deṅbe al beṅ al deṅem yaṅ yeṅ deney palap dirde haṅ, munaṅ neṅ gabe al siksukṅeṅ yeṅ palap ma dirde haṅ. ¹¹ Fudinde, neṅbe metey miṅ urtiriṅde mat waṅ waṅ ga hite gayenterbe binṅge ninṅ kamde, fe ninṅ kamde, ulniniṅ umṅa

minjon, irde al belen bulun bulun wor po dirke ulninin misin katen hityen. Irde yaninin minjon geb, kurar mat kurar kun kun ten hityen. ¹² Nenbe binje nin nurdeb nindiken meten kurun ten gab yade hityen. Al kura belen karan durkeb nenbe Al Kurunyen tarende guram yirde tarene yirde hityen. Al kura belen bulun bulun dirkeb goke mukku ma ten goya goya meten ten hityen. ¹³ Al kura mere bulun mat dirkeb nenbe igin mat wol hen yunen hityen. Minde mat wan wan hanke hite gayenter nenbe det bulun kura yimiytinen dirtek yara hite.

¹⁴ Gwaha dinmekeb memya henañ yen ma asañ ga kan dunen hime. Gwaha dirtinenbe den goyen dirinne yago yara geb, bener mat den ge amañen wor po nurdeb gago nurde ga hinayin yen saba dirde hime. ¹⁵ Yesu Kristu nin saba dird dird marbe budam wor po han. Goyenbe adotin yagobe budam gwahade ma han. Ne wa kun Yesu Kristu nin yitin mere goyen momon dirmeke yen ge dufaytin sanin iramin geb, nebe Yesu Kristuya henbe den kurun gote adotin yara himirin. ¹⁶ Ningeb nere mata po kenkela gama irde hinayin yenbe gago batbat dirde hime. ¹⁷ Goke tenbe Timoti gogo den hitte ten kermeke kuyen. Yenbe urne yara, bubulkunen wor po yen nurd unen himyen. Yenbe binde mat fudinde wor po Doyan Al Kurun nin meten ten hiyen. Yen belen gab ne gayen Yesu Kristuya hen mata dahade ten himyen goke momon dirke bitin bak yiyen. Yenbe ne belen Yesuyen alya bereya sios megen hike kwa kurun goyen saba yirde himyen gwahade goyen

po momon diryen.

¹⁸ Goyenbe den han bana goyen kuratin kurabe, “Polbe sopte ma wan dinyen,” yen nurdeb nen nurhet nurhet ten han. ¹⁹ Gega Doyan Al Kurun belen igin ninkeb hen ga hen ga ma tiyen, goyare po kun denen. Kun gab parpar ten han mar goyen mere dahade ten han, irde taren daminde mata gogo ten han yen kenkela yenen bebak tiyen. ²⁰ Al Kurun belen alya bereyamin doyan yirde hi gobe merere po mon, tarenminde doyan yirde hi. Ningeb kun gab mel go sanin daminde mata gogo ten han goyen yenen. ²¹ Ningeb kun daha dirmeke gab igin yen nurnayin? Bearar hende kwep kwep diren ma, bekkende igin mat mere direnbe igin?

5

Mata bulun ten han mar hayhay yirde hinayin

¹ Be, den han bana gon alya bereya kura leplep mata ten han gote mere momon nurmin. Al kura naniinde beremya duwan ten har gobe Al Kurun ma nurd unen han mar wor mata gwahade ma ten hanyen. ² Goyenpoga denbe mata gwahade forok yen hi goke bulunen ma nurde tumnan Al Kurun dilinde igin po hite yen dindiken ge turun turun ten han. Mata bulunmin goke bitin misin nurde esenbe mata bulun titin al goyen denya epte ma awalik hetek yen takira titek yarabe gwaha ma irde han. ³ Nebe denya gor ma hite gega, dufaynerbe denya gor hite. Ningeb nigen gor hime yara tenbe mata go tiyun al gob bikken mata bulun tiyan inmin. ⁴⁻⁵ Ningeb

den beley Doyan Al Kuruninin Yesu Kristu nin ten gabu irdeb al go takira tike Satan yufukde hen kanduk yenen hiyen. Dufaynebe den gabu irde hinayinde gor denya hiyen, irde Doyan Al Kuruninin Yesu Kristuyen taren manan den hitte hiyen geb, igin gwaha tinayin. Gogab al go kanduk bana henyabe mata bulun timin yen bebak tenbe megen nin dufay bulun go tubul tikeb kame Doyan Al Kurun wan wan nalureb al go tumulgan tiyyen.

⁶ Ningeb mata bulun gwahade goyen den bana hikeya dindiken ge turun turun ma ten hinayin. Denbe yis dirnen mun kura palawa bana kerkeb gore hilyan kunbe palawa ditdi niyyen go goyen ma nurde han? ⁷ Nurde han kenem mata buluntin gobe yis girmanen hitin yara geb, goyen yade sina yirnayin. Irkeb denbe palawa gergen yis gam mon yara Al Kurun dilinde wukken hinayin. Yesu Kristu beley mata buluntin halde dunen yen Pasobare nin sipsip dirnen yara* hen kuruse hende kamyin geb, denbe mata buluntin minmon mar hitin han. ⁸ Ningeb nenbe megen henyabe dufay bulunya mata bulunya yis bikkek yara goyen yubul po ten mata wukkekya mere fudindeva po ten hitek. Go ten hitek gobe Israel mar beley Pasoba nalure beret yis minmon nene hanyen gwahade goyenbe gogo.

⁹ Be, hakot kura ne beley asande al wet kura ma

* **5:7:** Bikken Israel mar Isip nana tubul ten Kenan kunin tiyaminvabe Al Kurun beley sipsip al dirin dirnen gasa yirde darim yade yame kantayan sam yirnayin yinyin. Pasoba Sipsip Dirnenbe alyen gasun tenbe kamyin al Yesu nin yitin.

bere wet kura leplep mata ten hikeb go mar goyen awalik ma yirde hinayin yen kan dunmirin.†
 10 Go dinmirin gote minbe leplep mata ten han mar, det ug po yad yad nin po dufay hen han mar, al hoyan gasa yirnin yirnin yirde kawe yirde han maryabe det tonej al belen yirtin dolon yirde han mar goya ma po hinayin yen ma dinmirin. Munan go mar goya ma hitek yenbe go yilwa yirdeb kun damde hinayin? Gor kura hitek minmon. 11 Ningeb asan ga kan dunen hime gabe den han bana al kura belen, “Nebe Yesu gama irde hime geb, nebe kadtin,” dinen hiyen gega, mata bulun kura ten hikeb yenya ma awalik hen hinayin yenbe gago kan hime. Mata bulun gobe gahade: leplep mata, det ugun po yad yad nin po dufay hen hen mata, ungura dolon yirde yirde mata, mere bulun mat ten ten mata, kukuwa fe nene kukuwa hen hen mata, irde al gasa yirnin yirnin yirde kawe yird yird mata. Den han bana al kura mata bulun gwahade ten hike yenenbe awalik ma po irde hinayin. Dula wor yenya ma po ten hinayin.

12-13 Al Yesu ma nurd unen han mar gore mata bulun ten han goke merem yan yird yird gobe nere samun mon geb, matamin goke ma nurde hime. Mata bulunmin gobe Al Kurun belen gab merem yan yiryen. Goyenpoga den han bana goyen al kura belen mata bulun tikeb ganun mar belen gab goke innayin? Den gog po geb. Goke tenbe, “Den han bana goyen al kura mata bulun

† 5:9: Pol belen asan budam kayyin goyen Baibelde ma han goyen bana mere tiyyin gokeb gago yen hi.

teŋ hike keneŋbe al go takira tinayiŋ. Irkeb denya ma hinayiŋ,” yeŋ haŋ.

6

Kadom merere gerd gerd ma teŋ hinayiŋ

¹ Be, dindigeŋ bana goŋ al kurabe kadomya kanduk miŋyaŋ go sope irye yeŋbe daniŋ Al Kurunyen alya bereya hitte ma kuŋbe megen niŋ marte mere nurd nurd al hitte kuŋ haŋ? Mata gwahade titek moŋ goyen daniŋ gwaha teŋ haŋ? Gobe buluŋ wor po! ² Deŋbe kame nalu funaŋdebe neŋ Al Kurunyen alya bereya beleŋ megen niŋ mar merere yerde matamiŋ goke yintek goyen ma nurde haŋ geb, gogo mata gwahade teŋ haŋ? Irde deŋ beleŋ kame megen niŋ mar merere yerde matamiŋ goke yintek haŋ kenem deŋ bana kanduk dirneŋ muŋ kura forok yitiŋ goyen dindikeŋ epte ma kanduk go sope yirnayiŋ? ³ Deŋbe nalu funaŋde Al Kurunyen miyoŋ mata buluŋde kateŋ unŋura hitiŋ goyen wor neŋya denya beleŋ merere yerde matamiŋ goke yintek yeŋ ma nurde haŋ geb, gogo mata gwahade teŋ haŋ? Neŋbe kame mata kurun goyen wor igiŋ titek kenem det dirneŋ megen heŋya neŋ bana kadniniŋya kanduk forok yeŋ haŋ gobe epte sope yirtek. Goyenbe gwaha ma teŋ haŋ! ⁴ Deŋbe dindikeŋ bana kanduk kura goke kadom mohonŋde titek goyen forok yekeb kanduk go sope irniŋ yeŋbe daniŋ megen niŋ mar Yesuyen alya bereya yeneŋmiŋbe sios bana deŋem moŋ yeŋ yeneŋ haŋ mar hitte yad kuŋ haŋ? ⁵ Ga diniŋ hime gabe nurde memya henan

yenbe gago dinen hime. Den Yesu nin dufaytin tareɓ irtin mar bana goɓbe kanduktin sope ird ird al kuram moɓ? ⁶ Hubu niɓgeb gogo dindiken ulin kadam igin ma nurd gunen tenbe merere yirnin yen Yesu nin dufaymin sanin ma irde han mar dilinde yukun han?

⁷ Fudinde, den han bana kadtiɓya kanduktin minyan goyen megen nin marte merere yerteke sope irnayin yen al sinare nin hitte yukun han gobe Al Kurun dilinde bikken soɓ han yen denen hi. Niɓgeb gwaha ma ten hinayin. Kadtin belen usi dirde bulun bulun dirde hike goɓmin goɓ gwaha dirde hinan yen hinayin gobe igin yen nurde hime. ⁸ Neb gwaha dinen hime goyenbe fudinde wor pobe al usi yirde bulun bulun yirde han marbe al hoyan moɓ den gogo yen nurde hime.

⁹ Denbe mata bulun ten han marbe Al Kurun belen alya bereyamin doyan yirde hi bana goɓ epte ma hurkunayin goyen ma nurde han? Niɓgeb al kura belen usi diryenkek geb, kenkela hen ga hinan ko. Mata bulun gobe gahade: lelep mata, unɓura doloɓ yird yird mata. Irde al kura berem yan gega bere hoyanya duwan ten ten mata, al belen belen nin bere yara hen hen mata, irde al dirin yingen po ulin gabu ird ird mata. ¹⁰ Irde kurabe kawe mata, det ug po yad yad nin po dufay hen hen mata, kukuwa fe nene kukuwa hen hen mata, al mere bulun mat yird yird mata, irde al gasa yirnin yirnin yirde kawe yird yird mata. Al mata gwahade ten han mar gobe epte ma wor po Al Kurun belen alya bereyamin doyan yirde hi bana goɓ hurkunayin.

¹¹ Bikkenbe den hañ bana goyen al kurabe mata gwahade ten hinhan. Goyenpoga Doyan Al Kurun Yesu Kristuya Holi Spiritya belen mata buluntin goyen halde dunenbe Al Kurun dilinde wukkekkor wor po dirde al huwak dirtin hañ.

Ultin kenkela doyan yirde Al Kurun turun ir-nayin

¹² Be, den hañ bana goyen al kura belen, “Nenbe mata kura tiniñ yenbe igin ala titek,” yen hanjen. Gega mata go tinayin gore huginen igin dirnayin yen ma nurde hinayin. Ningeb nebe mata kura tiye yenbe igin ala tiyen gega, mata gore epte ma nanarde bon yiyyen. ¹³ Irde kuratin kurabe, “Bingebe bininin makin ird ird det, irde bininibe binje sola urd urd nin po,” yen hanjen. Gega kamebe Al Kurun belen det irawa goyen tumnan mugol kiryen. Goyenbe han karya Al Kurun belen alya bereyat ulin yiryin gobe min minyan yiryin. Ulninibe lelep mata ten ten ge ma yiryin. Gwaha titnenbe Doyan Al Kurun denem tunun yan ird ird nin yiryin, irde Doyan Al Kurunbe ulninin guram yirde taren yird yird nin hi. ¹⁴ Al Kurun belen Doyan Al Kurun Yesu ulninin gake ten kamyin goyen sopte isan hirin. Ningeb kame nen wor tarenminde kamtinde mat disan hiyyen. ¹⁵ Denbe Yesu Kristuyen ulin pigin yara hañ geb, kuratin kurabe Yesuyen hanin, kurabe kahan hitin hañ goyen nurtin ala ten hañ. Gega nen Yesu Kristuyen ulin pigin hitin gayen igin kurhan kura ten belen nin bere sikkenya gabu irtek? Epte mon. ¹⁶ Al Kurunyen asanbebe, “Alya bereya wan gabu

henbe ulin un̄kuren̄ hiyyen̄,” yitiñ hi. Niñgeb al kura belen niñ bereya gabu hiriryen̄be bere goya ulin un̄kuren̄ hiyyen̄ go goyen ma nurde han̄?
¹⁷ Goyenbe al kura Doyan̄ Al Kurun̄ niñ dufaymin̄ san̄iñ iryen̄ al gobe tonen̄be Doyan̄ Al Kurun̄yen tonen̄ya gabu hen̄ un̄kuren̄ hiyyen̄.

¹⁸ Niñgeb lelep matabe tubul po ten̄ hinayin̄. Mata bulun̄ hoyan̄be al hoyan̄ bulun̄ yirde han̄yen. Munan̄ lelep mata ten̄ hinayin̄be dindiken̄de ultin̄ goyen po bulun̄ yirde hinayin̄.
¹⁹⁻²⁰ Irde ultin̄be Holi Spirityen ya balem yen̄ nurde hinayin̄. Holi Spirit Al Kurun̄ belen̄ duntin̄ gobe ultin̄ bana hi. Mata bulun̄tin̄ gote murungem dindiken̄ yawartek goyen Doyan̄ Al Kurun̄ belen̄ yawaren̄ yen̄be darim wok irde kamyin̄ geb ultin̄ gobe dende mon̄. Niñgeb ultin̄ go ken̄kela doyan̄ yirde hikeb gore meten̄ ten̄ hikeb Al Kurun̄yen den̄e kurun̄ hen̄ hiyen̄.

7

Ire un̄yat mata ken̄kela gama irde hinayin̄

¹ Be, asan̄ kan̄ gusun̄an̄ niran̄ goyen wol hen̄be gaha dinen̄ tihim. Be, al berem mon̄ hinayin̄ gobe igin̄ yen̄ nurde hime. ² Goyenpoga alya bereya budam wor po lelep mata ten̄ han̄yen geb, albe berem yan̄ henayin̄, irde berebe un̄ minyan̄ henayin̄. ³ Albe berem belen̄ yen̄ya hen̄ hen̄ ge nurkeb go po gama irde hiyen̄. Gwahade goyen po, bere wor un̄ belen̄ yen̄ya hen̄ hen̄ ge nurkeb go po gama irde hiyen̄. ⁴ Gobe beremde ulin̄ gobe yende kudinen̄ po mon̄, gobe un̄de manan̄ geb, gago dinen̄ hime. Un̄yen ulin̄

wor yende kudiñeñ po moñ. Beremde manañ. ⁵ Niñgeb al beñ berem bada ma irde hiyeñ. Bere wor gwahade po uñ bada ma irde hiyeñ. Gega Al Kuruñ mere ird ird niñ teñ tumñande dufay uñkureñ irde muñ kura kutña irye yeñbe igiñ gwaha teñ hiriryenñ. Goyenbe go kamereb sopte gabu teñ hiriryenñ. Gwaha ma teñ hiriryenñbe bereya ma alya ferd ferd dufaymiñ epte ma fole irtek hekeb Satan beñ wañ tunañ yuryenñ geb. ⁶ Ga dinenñ hime gabe gwaha po teñ hinayiñ yeñ nurdeya ma dinenñ hime. Gwaha teñ hinayiñ gab igiñ yeñ nurdeya dinenñ hime. ⁷ Albe ne yara heñ berem moñ hiwoñ yeñ nurde hime. Goyenpoga albe nende gigen Al Kuruñyen tareñ hoyañ hoyañ yuntiñ hañ. Niñgeb al kurabe berem moñ gega, goke ma nurde hanñen. Munañ al kurabe gote tareñ ma teñ sañiñ hoyañ titiñ geb, bere yade ga hanñen.

⁸ Be, al kura bere ma yawartiñ hañ goya bere-tapyabe ne hime gahade duliñ hinayiñbe igiñ yeñ nurde hime. ⁹ Goyenpoga al niñ ma bere niñ dufaytiñ harke epte ma hika titek kenem albe bere yade berebe al yade teñ hinayiñ gobe igiñ yeñ nurde hime. Moñgo duliñ heñbe albe bereya, berebe alya ferd ferd niñ bitiñ harke kak beñ det kunga titiñ yara epte ma hika titek henayiñ.

¹⁰ Be, al berem yañ, irde bere uñ miñyañbe mere tareñ po dirde hime gayen nurnayiñ. Mere gabe nere moñ, Doyañ Al Kuruñyen mere. Niñgeb bere uñ miñyañbe uñ yilwa ma iryenñ. ¹¹ Goyenbe bere go uñ tubul teñ keneñbe duliñ po heñ al hoyañ ma tiyyenñ. Moñ kenem uñ hitte mulgañ

henj tumňanj hiriryenj. Irde al wor berem ma takira tiyyenj.

¹² Be, denj hanj bana goň ire unja kura uň wet ma berem wet goyen Yesu ma nurd untiň goke saba direň tihim. Be, berem gore uň goya tumňanj hireň yenj nurde hike kenem uň belenj takira ma tiyyenj. Mere gabe Doyan Al Kurunjen monj, dufayner dinenj hime. ¹³ Irde denj hanj bana goň niň bere wor uňbe Yesu ma nurd untiň gore berem goya hireň po yenj nuryenbe bere gore uň yilwa ma iryenj. ¹⁴ Gobe al kura Yesu ma nurd unenj hi goyen berembe Yesu nurd untiň hi goke tenbe kame Yesu niň dufaymiň tarenj irkeb Al Kurunj belenj wukkek iryenj geb, gago dinenj hime. Bere kura Yesu ma nurd untiň hi wor uňbe Yesu nurd unenj hi goke tenbe Yesu niň dufaymiň sanj irkeb Al Kurunj belenj wukkek iryenj. Gwahade monj manhan ire unja gote dirnenj wenbe Al Kurunj diliňde wukkek ma hewonj. Goyenbe naniň ma miliň kura Al Kurunj diliňde wukkek hitiň geb, dirnenj wenj wor wukkek hitiň hanj.

¹⁵ Gega Yesu niň ma nurtiň kura belenj uň wet ma berem wet go tubul tiye yeke goya utanj ma irnayiň. Yesu niň ma nurtiň kura belenj uň wet ma berem wet Yesu niň nurtiň go takira tike goke kanduknenj ma nuryenj. Igiň duliň hiyenj. Gega Al Kurunj belenj nenj gayen bininiň yisikamke igiň po hinayiň yenj hoy diriň geb, bertiň wet ma almetiň wet Yesu niň ma nurtiň goya bur ma yenbe awalikde hiriryenj. ¹⁶ Denj Yesu niň nurtiň bere, denj ge tenj almetiňbe Yesu niň dufaymiň tarenj irke Al Kurunj belenj yawaryenj daw yenj ma

nurde haŋ? Irde deŋ Yesu niŋ nurtiŋ al, deŋ ge teŋ bertinbe Yesu niŋ dufaymiŋ tareŋ irke Al Kurun beleŋ yawaryeŋ daw yeŋ ma nurde haŋ? Niŋgeb Yesu niŋ nurtiŋ kura beleŋ uŋ wet ma berem wet goyen Yesu niŋ ma nurtiŋ goke teŋ tubul ma tiyyeŋ.

Al Kurun beleŋ gwahade hinayiŋ yeŋ hoy dirtiŋ gwaha mat po hinayiŋ

¹⁷ Goyenpoga deŋ dunkenen dunkenen goyen gwahade hinayiŋ yeŋ Al Kurun beleŋ hoy dirtiŋ, irde Doyan Al Kurun beleŋ goke momon dirtiŋ gwaha mat po hinayiŋ. Saba gabe Yesuyen alya bereya tumnan gama irde hinayiŋ yeŋ gago saba dirde hime. ¹⁸ Niŋgeb al kura Al Kurun beleŋ hoy iryiŋ goyenter bikken guba yitiŋ kenem al go guba yeŋ uliŋ delen yeŋ hitiŋ go daha mat bikken guba ma yenya hiyen gwahade hewe yeŋ kurut ma yiyyeŋ. Irde al kura Al Kurun beleŋ hoy iryiŋ goyenter guba ma yitiŋ kenem guba yeŋ yeŋ ge kurut ma yiyyeŋ. ¹⁹ Guba yitiŋ ma, guba ma yitiŋ gobe Al Kurun diliŋdebe det kurun mon. Munan Al Kurunen saba gama ird irdbe det kurun wor po. ²⁰ Niŋgeb Al Kurun beleŋ hanƙapya dahade hikeya hoy dirtiŋ gwahade po hinayiŋ. ²¹ Niŋgeb deŋ haŋ bana gon al kura al hoyan yufukde heŋ duliŋ meten teŋ hikeya Al Kurun beleŋ hoy diriŋ kenem daha tiye tiye ma tiyyeŋ, gwahade po hiyeŋ. Gega dufayminde heŋ heŋ belen kura kinyeŋ gobe igiŋ gwaha tiyyeŋ. ²² Al kura al hoyan yufukde heŋ meten al dulnen hikeya Doyan Al Kurun beleŋ hoy irde tiriŋ al gobe Doyan Al Kurun diliŋde meten al

dulneŋ moŋ yeŋ kinyeŋ. Irde gwahade goyen po, al kura meten al dulneŋ moŋ, yingeŋde dufayde kuŋ hikeya Doyaŋ Al Kuruŋ beleŋ hoy irde tirin al gobe meten alne yeŋ kinyeŋ. ²³ Dende mata buluŋ gote muruŋgem dindikeŋ yawartek goyen Doyaŋ Al Kuruŋ beleŋ yawareŋ yeŋbe darim wok irde kamyin geb, megen nin marte mata buluŋ gama irde go yufukde ma hinayin. ²⁴ Niŋgeb, kadne yago, sopte dineŋ hime. Al Kuruŋ beleŋ deŋ duŋkureŋ duŋkureŋ dahade hikeya hoy dirtin gobe gwahade po hinayin.

²⁵ Be, deŋ haŋ bana goŋ al kura berem moŋya bere uŋ miŋmoŋya nin momoŋ direŋ tihim. Alya bereya gwahade goyen goke Doyaŋ Al Kuruŋ beleŋ mere ma nirtin geb, dufayner momoŋ direŋ. Nebe Doyaŋ Al Kuruŋ beleŋ bunineŋ nirde hiyen al niŋgeb, mere direŋ tihim gabe fudinde yeŋ nurnayin. ²⁶ Be, ga hite nalu gayenterbe kanduk kurayen kurayen yeneŋ yeneŋ nalure hite. Niŋgeb heŋ heŋtin dahade hanŋen gobe gwahade po hinayin. ²⁷ Niŋgeb al kura berem yaŋ kenem takira tiye tiye ma tiyyeŋ. Munan al kura berem moŋ kenem bere tewe tewe ma tiyyeŋ. ²⁸ Goyenbe bere tiyyeŋ gobe mata buluŋ moŋ. Gwahade goyen po, bere foŋeŋ kura al kuyeŋ go wor mata buluŋ moŋ. Gega al bere tiyyeŋ irde bere uŋ miŋyaŋ hiyyeŋbe megen gar nin kanduk kurayen kurayen yeneŋ hinayin. Deŋ goyen kanduk ma yeneŋ hiwoŋ yeŋ nurdeb gago momoŋ dirde hime.

²⁹ Kadne yago, ga dineŋ hime gate miŋbe gahade: megen gar heŋ heŋniniŋbe ulyaŋde moŋ

geb, al kura berem yaŋ gobe al berem moŋ beleş Al Kuruŋ niŋ po nurde haŋyen go gwahade goyen teŋ hiyen. ³⁰ Irde al kura kanduk yeneŋ eseŋ hiyen gega, kanduk go sobamde ma hiyen yeŋ nurdeb goke uguŋ po ma dufay heŋ hiyen. Munan al kura aman hiyyeŋ gega, aman dufay go hugiŋeŋ gwahade po ma hiyen geb, “Gahade po heŋ,” yeŋ ma nurde hiyen. Irde al kura det damu tiyyeŋ wor, “Det gabe hugiŋeŋ kerde heŋ,” yeŋ ma nurde hiyen. ³¹ Irde det megen niŋ haŋ kuruŋ gayen manan gahade po ma hinayiŋ geb, al kura megen niŋ det yade meten yuneŋ heŋyabe det go hende po biŋ hek ma irde hiyen.

³² Niŋgeb daha tiniŋ tiniŋ teŋ dufaytiŋ hi-burŋeŋ ma hiwoŋ yeŋ nurde hime. Al kura berem moŋ gobe dufaymiŋde daha mat meten timeke Doyaŋ Al Kuruŋ amanen nurde hiyen yeŋbe gwaha mat po meten teŋ hiyen. ³³ Gega al kura berem yaŋbe daha timeke gab berne amanen nurde hiyen yeŋbe goke po kurut yeŋ hiyen. Go teŋ hi gobe megen niŋ mata niŋ ug po dufay heŋ heŋ mata go goyen. ³⁴ Gwaha tikeb Doyaŋ Al Kuruŋ beleş amanen nurtek beleş niŋ dufay heŋ heŋmiŋbe keŋkela kipirtiŋ ma hi. Be, bere kura uŋ miŋmoŋya bere foŋeŋyabe Doyaŋ Al Kuruŋ niŋ po nurde uliŋya dufaymiŋya tumnan Doyaŋ Al Kuruŋ po unen haŋyen. Munan bere kura uŋ miŋyaŋbe daha timeke gab almene amanen nurde hiyen yeŋbe goke po kurut yeŋ hiyen. Go teŋ hi gobe megen niŋ mata niŋ ug po dufay heŋ heŋ mata go goyen. ³⁵ Mere ga dirde hime gabe faraŋ durmeke heŋ heŋtiŋ igiŋ hewoŋ

yeŋ dinen hime. Kanduk dunhem yeŋ ma dinen hime. Mere gahade ga dirmeke gab matatinbe Doyaŋ Al Kurun dilinde huwak wor po hiyyen, irde yeŋ ge ten meten ten ten nin kama ma hen sanin po meten ten hiwon yeŋ nurdeb gago dinen hime.

³⁶ Goyenpoga al fonen kura bere tubul ten untek yeŋ merem titin goreb merene gayen nurdeb, “Polyen mere gobe fudinde. Goyenpoga meremin gama irde bere ga tewen monbe dufaymin bulun iren geb tewen,” yeŋ nuryenbe bere go tiyyen.* Mata gobe bulun mon. Irde hiyen kurun gobe bere go tubul titek ma irde hike kenem bere go tiyyen. Mata gobe bulun mon geb, gwaha tiyyen.

³⁷ Gega al kura bikken bere tubul ten untek yeŋ merem titin gega, al gore, “Igin nunkuren hen,” yeŋ dufay taren po irdeb, “Bereya hen hen dufay ma forok yeŋ hi, irde dufay gwahade kura forok yeke igin fole irde hen,” yeŋ nurdeb bere ma tewen yeŋ dufay kiryen goyen wor mata igin yeŋ nurde hime. ³⁸ Nin geb al bere yad yad matabe igin. Gega al kura berem mon hiyyen mata gobe igin wor po, bere yad yad mata gote folek.

³⁹ Be, bere kura un minyanbe un go hikeyabe yeŋ yufukde po hiyen. Gega un go kamkeb bere un yanbe al hoyan ma tiyyen yitin mere gote yufuk bana ma hiyen geb, al hoyan tewe yenbe igin tiyyen. Goyenpoga Doyaŋ Al Kurun nurd

* **7:36:** Grik mere mat min kurabe gahade: Goyenpoga al kura beley wirin al kutek nurke beleymin pet ten hike kun kun alik hewen tike kenenbe bulun irde hime yeŋ nurdeb al kere yeŋ nuryenbe gwaha po iryen. Mata gobe bulun mon.

untin al po ga tiyen. ⁴⁰ Goyenbe dufaynerbe bere go un kamke unjkuren hen hen gobe igin wor po. Gogab un nin nurde hiyen gwahade ma ten Doyan Al Kurun nin po nurde hiyen. Mere dirde hime gabe Holi Spirit belen ninen hike dinen hime yen nurde hime.

8

Det tonen yirde binje galak yirtin binjebe daha yirtek?

¹ Be, megen nin mar belen det tonen yirde dolon yirde binje galak yirtin goke momon diren tihim. Denbe dindiken ge yenbe, “Nenbe det kawan ninja banare ninja goyen kenkela bebak ten hite,” yen nurde han. Goyenbe gwahade nurde han goke tenbe dindiken ge turun turun tenbe kadtin yago bulun yirde han. Gega kadtin yagon amanen nurd yunen hinayinbe kadom faran gurd tenbe tumnan sanin henayin. ² Al kura yingen ge yenbe, “Nebe det kawan ninja banare ninja goyen kenkela wor po bebak ten hime,” yen nurde hi al gobe yingen goyen po usi irde hi. Irdeb Al Kurunyen mere fudinde yingen nurde bebak titek goyen bebak ma titin hi. ³ Goyenpoga al kura binde mat Al Kurun nin amanen nurde unen hi al gobe Al Kurunyen dufay igin kurun goyen untin hi.

⁴ Ningeb det tonen dolon yirnin yen galak yirtin binje goke momon diren tihim. Be, det tonen megen nin mar belen dolon yirde hanyen gobe Al Kurun mon geb, det fudinde gogo mon. Al Kurunbe yen unjkuren po, hoyan kura ma hi. Hubu

wor po. ⁵ Gega megen niŋ marbe dufaymiŋ soŋ hekeb uŋgura kurayen kurayen gobe Al Kurun yeŋ nurdeb, “Al Kurunbe budam haŋ. Doyaŋ Mar wor budam haŋ. Kurabe naŋkinde haŋ, kurabe megen haŋ,” yeŋ haŋyen. ⁶ Goyenpoga Al Kurunbe uŋkureŋ po, neŋ nurd uneŋ hite gog po hi. Yeŋbe Adoniniŋ. Yeŋ beleŋ po gab naŋkiniya megenya irde det kurun gayen yiryiŋ. Irde neŋbe yeŋ ge teŋ megen gar hite. Irde Doyaŋ Al Kurun wor uŋkureŋ po hi. Yeŋbe Yesu Kristu. Yesu Kristube Al Kurun beleŋ inke naŋkiniya megenya det kurun gayen yiryiŋ. Neŋ wor yeŋ beleŋ forok diryiŋ.

⁷ Goyenbe mere fudinde gayen al budambe keŋkela bebak ma teŋ haŋ. Niŋgeb deŋ haŋ bana goŋ al kurabe hakot Yesu niŋ ma nurde hinanya uŋgura doloŋ ird ird mata teŋ hinhan geb, gayenter Yesu nurd uneŋ heŋya wor uŋgura galak yirtiŋ goyen nenebe, “Neŋbe uŋgura galak yirtiŋ biŋge goyen gago nene hite,” yeŋ nurde biŋde kandukneŋ nurde haŋyen. Mel gobe biŋde wukkek wor po moŋ geb, “Biŋge ga nihit garebe Al Kurun diliŋde wukkek ma hihit,” yeŋ nurde haŋ. ⁸ Gega biŋge nen nen mata gore kura neŋ gayen Al Kurunya awalik heŋ heŋniniŋ goyen daha kura ma iryeŋ. Niŋgeb uŋgura galak yirtiŋ biŋge netek ma go ma netek gore kura Al Kurun diliŋde daha wet kura ma diryeŋ.

⁹ Goyenpoga moŋgo mata kura Al Kurun diliŋde buluŋ moŋ goyen hipirkeŋ nurdeya mata teŋ hinayiŋ gore kadtiŋ kura Al Kurunyen mere biŋde tareŋ wor po ma hitiŋ al gote dufaymiŋ

goyen bulun irke katyenkek geb, kenkela dufay hen ga mata ten hinayin. ¹⁰ Den Al Kurunyen mere kenkela bebak titin marbe igin kun ungura dolon ird ird gasunde hen dula ten kun hinayin. Gega den belen gwaha ten hike den han bana gon nin kadtin kura bin wukkek wor po mon gore denenbe, “Nen wor igin daw gwaha titek,” usi tenbe binje go nene gab mata bulun tihit yen kanduknen nurdeb katnayin. ¹¹ Irkeb denbe kadtinde dufaymin taren wor po mon goyen bulun ird ird mar henayin. Yen ge ten Yesu Kristu kamyin gega, den belen bulun yirnayin. ¹² Den belen gwaha mat kadtin goyen bulun yirde mata bulun ten hinayin, irde bin wukkek wor po mon goyen haga irde hinayin gobe yen hitte po mon, Yesu Kristu hitte wor mata bulun ten hinayin. ¹³ Ningeb nebe dapna kura nemeke gore kadne dufaymin bulun irke mata bulunde katyen kenem dapna go sopte ma po newen. Gogab kadne go mata bulunde ma katyen.

9

Ne Pol wor Yesuyen mere basan al aposel

¹ Be, den belen ne nin yen, “Dufayminde epte ma det kura iryen,” yen nurd nunen han? Irde ne gayen Yesuyen mere basan al aposel mon yen han? Irde Doyan Al Kuruninin Yesu Kristube ma kinyin yen nurde han? Goyenpoga Doyan Al Kurunyen saninde meten timirin gote iginenbe den gogo mon? Goyenbe dani gwaha yen han? ² Be, den han bana goyen al kura belen, “Polbe aposel mon,” yen han. Irde al hoyan belenbe,

“Polbe neñ ge ma aposel hirin,” yeñ hañ. Nebe meremin goke ma nuren gega, den ge ten aposel himirin geb, denbe epte ma gwaha ninnayin. Al hoyañ belen den denenbe, “Fudinde, Polbe Doyañ Al Kurun belen aposel iryin,” yeñ nurd nunen hinayin.

³ Be, den hañ bana goyen al kura belen gwaha mat tagal nunen hañ geb, goyen wol heñ momon direñ tihim geb. ⁴ Be, neñ aposel belen meten ten hiteke goke Yesuyen alya bereya belen binjeya feya dunke netek gobe bulun? ⁵ Yesuyen mere basañ mar hoyanya Doyañ Al Kurun Yesu kulin wenyabe Pitaya* wor berem yagoya irde tumñan meten ten kun hanjen. Munañ nenbe berninin yago dufaymin Yesu nin taren irtin goya meten ten kun hitekbe bulun yeñ nurde hañ? ⁶ Irde aposel hoyañ po paka yirde hanjen gega, Ban-abasya neya nin yenbe, “Yingen ga tarenminde binje neneb meten ten hiriryen,” yeñ nurde hañ?

⁷ Be, fulenja mar fulenare kun henjabe ganun kura yingen de horare binje damu ten nene hanjen? Irde al ganun kura wain harke iginen hekeb kura ma nen hiyen? Irde al ganun kura sip-sipmin doyañ yirde hiyen gega, sipsip gote mamu kura ma gilyan heñ nene hiyen? Epte ma gwaha tiyyen. ⁸ Mere ten hime gabe alyen dufayde po ma mere ten hime. Moseyen sabare wor mere gwahade po hi. ⁹ Be, Moseyen sabarebe, “Al kura wit metenmin sak yeke metende nin dapña bulmakawmin gore, ‘Farañ nuri,’ yeñ metenminde

* **9:5:** Denjem hoyanbe Sifas.

tukunya ga, 'Witne niyyenkek,' yen mohonj mala ma tiyyen," yitinj hi.

Mere gobe Al Kurunj belen bulmakaw ninj po nurdeb gogo yirinj? ¹⁰ Mere gwahade tiyyinj gobe fudinde wor po nenj gake nurdeb mere gogo tiyyinj yen ma nurde hanj? Mere gobe nenj gake yirinj. Megej waru uryen al goya wit sikkenj kok yiryen al goya tumnande metenj tiyiryenj gote murungem kura munj yawaryen yen nurdeya metenj tiyiryenj geb, Al Kurunjen mere gobe nenj al gake yirinj. ¹¹ Niñgeb nenj belenj Holi Spirityen det iginj goyen bitinj bana tur yirtirinj geb, metenjninj gote murungem binje ninj gusunanj dirtek gobe kanduk kurunj wor po yen nurnayinj? ¹² Al hoyanj belen denj ge tenj metenj dirnenj munj po titinj goke faranj durnanj yen iginj gusunanj dirtek kenem nenj mananj denj ge tenj metenj kurunj wor po titinj goyen gote murungem ninj iginj gusunanj dirtek.

Goyenbe nenjbe faranj durnanj yen gusunanj ma dirde hinhet. Gwaha titnenjbe monjo faranj durd durd gore Yesu Kristu ninj yitinj mere iginj go denj bana kurunj henj henj belen pet tiyyen yen nurdeb det kuranj nurde hinhet gega, gusunanj ma dirde goke ma nurdeya metenj tenj hinhet. ¹³ Be, denjbe Al Kurunjen ya balem bana metenj tenj hanjen marbe bana gonj ninj binje yade nene hanjen, irde Al Kurunj galak ird ird altare metenj tenj hanj marbe alta hende yirtinj binje goyen kura yade nene hanjen goyen go ma nurde hanj? ¹⁴ Gwahade goyen po, Doyanj Al Kurunj ninj yitinj mere iginj goke tagalde hanj marbe mere go nurde gama irde hanj mar belen faranj yurke go hende henj metenj tenj hinayinj yen Doyanj Al Kurunj belen

mere sanjij po tiyyij.

¹⁵ Nebe Doyan Al Kurun belen yirin gwahade po igij faran nurnan dinmewon gega, gwaha ma dinen himyen. Irde mere gahade kan dunen hime gabe den belen gwaha mat paka nirde hinayin yen ma kan hime. Nebe den ge ten Doyan Al Kurunyen meten ten henya gote murungem nin gusunan ma dirde hinhem geb, goke igij nigen ge turun turun titek hime. Ningeb faran nurd nurd nin al kura ma po gusunan iren. Kamde ga daw gwaha tiyen. ¹⁶ Be, Yesu nin yitij mere igij go tagalde kun henya nigen ge turun turun ten hitek himyen dinhem gega, epte ma nigen ge turun turun titek himyen. Mere igij tagal tagal gobe Al Kurun belen nunyin geb bada hetek mon. Ningeb meten ten himyen goke nigen ge epte ma turun turun titek himyen. Munan mere igij go bada hen tagalde ma himyen manhan Al Kurunyen bearar bana himewon! ¹⁷ Mere igij goyen tagal tagal nin wilaknen nurde tagalenbe gote murungem tewen. Gega meten ten hen gote murungem ma tewen wor Al Kurun belen gwaha ten hayin nintij geb, gago meten go ten hime. Meten gobe gwaha tiyayin nintij geb, bada hetek mon. ¹⁸ Be, gwahade kenem meten ten hime gote murungembe da tewen? Meten ten hime gote murungembe hoyan mon. Ne belen meten gote murungem tetek gobe Yesu nin yitij mere igij goyen damum mon dulin po alya bereya hitte tagalde himyen gogo po. Fudinde, nebe mere igij go tagalde hime goke ten paka nirnan yinen hitek gega, gwaha ma yinen himyen.

¹⁹ Be, nebe dufayner igin nurdeb gwaha ten himyen. Megen nin al kurate dufayde ma ten himyen. Gega daha mat kura al tumnan Yesu hitte yukumewon yen nurdeb nigen al buda kurun gote yufukde hen meten ten himyen. ²⁰ Gwahade ningeb, Yuda marya henbe go mar go Yesu hitte yuken yenbe yende mata gama ird ird al yara hen himyen. Yuda mar gobe Moseyen saba gote yufukde hen go po gama irde hanjen. Munan nigenbe go yufukde ma hime geb, gore epte ma daha wet kura niryen gega, go mar go Yesu hitte yuken yen nurdeb Moseyen saba gote yufukde hime yara ten himyen. ²¹ Munan Yuda mar mon al min hoyan Moseyen saba ma gama irde han mar go wor Yesu Kristu hitte yuken yenbe Moseyen saba ma gama irde hitin al yara hen himyen. Nigenbe Moseyen saba gote yufukde ma hime. Goyenbe Al Kurunyen saba pel irde hime yen ma yen hime. Gwahade yarabe Yesu Kristuyen saba gote yufukde po hime. ²² Irde Yesuyen alya bereya kura Al Kurunyen mere hende taren wor po ma huwarde hitin mar go Yesu hitte yuken yenbe go mar goyen yara po hen himyen. Nengeb al dahade mar hitte kun meten ten kun henyabe go mar goyen yara po hen meten ten himyen. Gogab daha mat wet kura go mar goyen kura Yesu hitte yukumewon yen gogo gwaha ten himyen. ²³ Gwaha ten himyen kurun gobe Yesu nin yitin mere igin goke al momon yire yenbe gwaha ten himyen. Gwaha ten himeke gab al belen mere igin go nurdeb yen wor nen yara hekeb tumnan Al Kurun belen guram yirtek

hewon yenbe gogo gwaha ten himyen.

²⁴ Be, kup yen yen kari gote matabe nurde han gogo. Al budam min urde kup yenayin gega, al unkuwen belen po kadam fole yirde kun pasi iryen al gore mun po gab gote murungem tiyyen. Ningeb den wor Doyan Al Kurunyen meten ten henyabe meten gote murungem goyen tetewon wor po yen nurdeb taren po meten ten hinayin. ²⁵ Kup yen yen karire kup yen han mar ma, kari hoyande kari ten han marbe karire kun gote murungem tini wor po yen nurdeb yingen sanin yird yird nin ulin kutna irde hanyen. Mel gobe kari gote murungem ulyande ma hitek goke wor gogo kurut wor po yen han. Goyenpoga nen belen taren hen hen nin kurut yen hityen gobe Doyan Al Kurunyen meten gote murungem huginen hitek go tini yenbe taren hen hen nin kurut yen hityen. ²⁶ Ningeb mel gore kup yen hanyen gobe Al Kurun dilinde min minmon gega, ne belen al kup yen han gwahade sanin po meten ten himyen gobe Al Kurun dilinde min minyan. Fuleya ten ten karire kari ten hanyen marbe asogom kenkela yenenya gasa yirde hanyen gwahade goyen po, ne wor meten gote min kenkela nurdeya meten ten himyen, mali ma meten ten himyen. ²⁷ Gwaha titnenbe meten goyen kenkela po timewon yen nurdeb megen nin dufay bulun kura bener forok yeke gore bulun nirnak yenbe fole irde himyen. Mongo Yesu nin al hoyan momon yirdeb gote murungem tetekner, dufay bulun gore walde nunnak yenbe gogo dufay bulun goyen fole irde himyen.

10

Ungura doloŋ ird ird niŋ hayhay yiryiŋ

¹ Be, kadne yago, deŋ goyen tareŋ heŋ heŋ ge kurut yeŋ hinayiŋ dinhem goke keŋkela bebak tinaŋ yeŋbe neŋ Yuda marte asiniŋiŋ yago beleŋ mata tiyamiŋ goke momoŋ direŋ tihim. Niŋgeb mel gore mata tiyamiŋ go nurdeb gote saba bitiŋ sir ma yiyyeŋ. Be, bikkeŋ wor po asiniŋiŋ yagobe Isip naŋa tubul teŋ kuniŋ yeŋ kuŋ heŋyabe tumŋaŋ kigariŋkiŋ faykek yokŋa bana heŋ kuŋ hinhan. Irdeb makaŋ ala kuruŋ goyen kahalte Al Kuruŋ beleŋ pota irke megeŋ fudiŋ forok yekeb goyaŋ mat kuŋ siŋa kurhan forok yamiŋ. ² Mel go tumŋaŋ kigariŋkiŋ faykek yokŋa bana heŋ kuŋ hinhan, irde makaŋ alayaŋ kwamiŋ gobe Al Kuruŋ beleŋ baptais yiryiŋ yarabe gogo. Be, Al Kuruŋ beleŋ gwaha yirdeb mel goyen Moseyen alya bereya yirkeb doyaŋ yirde hinhin. ³ Be, goyenter Al Kuruŋ beleŋ biŋge yuneŋ hinhin gobe megeŋ niŋ biŋge moŋ. ⁴ Irde fe niŋ yirke Al Kuruŋ beleŋ hora kuruŋde mat fe forok irde yunke nene hinhan. Hora kuruŋ gobe Al Kuruŋ hitte mat kateŋbe Israel mar goya tumŋaŋ kuŋ hinhin. Hora gobe Yesu Kristu gote tuŋaŋeŋ. ⁵ Al Kuruŋbe mel go igiŋ igiŋ gwahade yirde hinhin gega, al budam wor po mata buluŋ teŋ hike igiŋ ma nurde yuneŋ hinhin. Niŋgeb mata buluŋ teŋ hinhan mar go sawsawa po kuruŋ naŋa bana goŋ kuŋ heŋya kamamiŋ.

⁶ Be, mata buluŋmiŋ gote muruŋgem teŋ kamamiŋ gobe neŋ gayen baraŋmiŋ goyen nurdeb kafura heŋ mel gore teŋ hinhan gwahade

ma tenbe dufayniniŋ mata buluŋ ten ten niŋ ma kuŋ hiyeŋ yeŋ gogo Al Kuruŋ beleŋ dikala diryiŋ. ⁷ Niŋgeb denbe mel goyen kuramiŋ beleŋ megen niŋ det toneŋ yirde doloŋ yirde hinhan gwaha ma ten hinayiŋ. Mel gore mata buluŋ ten hinhan goke Al Kuruŋyen asaŋde gahade katiŋ: “Mel gobe det toneŋ diliŋ mar keperde dula ten kukuwa fe nen nen mata ten hinhan. Irde huwardebe Al Kuruŋ niŋ ma nurd untiŋ marte mata ten hinhan,” yitiŋ hi. ⁸ Be, mel goyen kuramiŋbe lelep mata tenbe naŋkahal unjkurende po 23,000 alya bereya goyen kamamiŋ. Niŋgeb neŋbe go mar gore tiyamiŋ gwahade ma ten hitek. ⁹ Be, Israel mar goyen kurabe Doyaŋ Al Kuruŋ tuŋaŋ urde beararmiŋ bana heŋ kunere duwi beleŋ yisike kamamiŋ. Niŋgeb neŋbe mel gore tiyamiŋ gwahade Doyaŋ Al Kuruŋ tuŋaŋ ma urtek. ¹⁰ Irde heŋ heŋtiŋ goke Doyaŋ Al Kuruŋ niŋ igiŋ ma nurde ŋagak ma yeŋ hinayiŋ. Hakot Israel mar kura gwaha tikeb Al Kuruŋyen miyoŋ, al gasa yird yird meten ten hiyen gore gasa yirke kamamiŋ.

¹¹ Be, hakot Israel mar hitte mata gwahade forok yitiŋ gobe gayenter neŋ beleŋ baraŋ go nurdeb bebak ten ten ge gogo forok yitiŋ. Irde baraŋ go asaŋde katiŋ gobe nalu funaŋ beleŋ hite mar gayen baraŋ go kapyaŋ heŋbe mata buluŋ ma ten hinayiŋ yeŋ hayhay dird dird niŋ Al Kuruŋyen asaŋde katiŋ. ¹² Niŋgeb den haŋ bana al kura beleŋ, “Nebe tareŋ hime geb, kanduk kura wayyeŋ goyen epte fole irde heŋ,” yeŋ hi al gobe keŋkela heŋ ga hiyeŋ. Moŋgo katyeŋ geb.

¹³ Alya bereya mata bulunđe yukutek kanduk den hitte forok yeŋ hanŷen gobe al hoyan hitte wor forok yeŋ hanŷen goyen po forok yeŋ dunen hanŷen. Goyenpoga Al Kurunbe yiriŋ gwahade po mata teŋ hiyen geb, den belen epte ma fole irtek kandukbe epte ma den hitte yubul tike forok yeŋ hinayiŋ. Munan kanduk kura den hitte forok yekeb kanduk go fole yirtek belneŋ manan kerd dunen. Gogab den goyen kanduk bana goŋ hinayiŋ gega, kanduk goyen igiŋ fole yirde sanŋ po huwarde hinayiŋ.

Epte ma tumnanđe Al Kurunya unguraya gama yirtek

¹⁴ Be, kadne yago, megen niŋ det yade det tonen yirde dolon ird ird mata gob tubul po tinayiŋ. ¹⁵ Den goyen dufaytiŋ wukkeŋ yeŋ nurdeb gago mere dirde hime. Niŋgeb dindiken gabe mere direŋ tihim gayen igiŋ ma bulun goyen kenen bebak tinayiŋ. ¹⁶ Be, neŋbe Yesu Kristu belen neŋ ge teŋ darim wok irde kamiŋ goke dufay heŋ heŋ niŋ gabu irde wain fimiŋ teŋbe Al Kurun igiŋ nurde unenbe nene hityen. Gwaha teŋ hite gobe Yesu Kristu kamkeya darim wok yitiŋ goyen neŋ tumnan gale heŋ nene hite yara geb, gore dawan gabu dirkeb al miŋ unkenen heŋ hityen gogo. Irde neŋ ge teŋ Yesu Kristu kamiŋ goke dufay heŋ beret ubala teŋ gale heŋ nene hityen gobe Yesu Kristu kamkeya gason erek yitiŋ goyen neŋ tumnan gale heŋ nene hite yara geb, gore dawan gabu dirkeb al miŋ unkenen heŋ hityen gogo. ¹⁷ Niŋgeb neŋbe al miŋ hoyan hoyan gega, beretbe hoyan hoyan mon, unkenen po nene

hityen geb, Yesuya awalik henbe al miñ unjkuren po hitiñ hite.

¹⁸ Be, Israel mar bikkenj mata tenj hinhan goyen goke nurnayiñ. Dapña gasa yirde Al Kurunñ niñ galak irtiñ goyen nene hinhan marbe Al Kurunña gabu irde unjkuren hitiñ hinhan. ¹⁹ Niñgeb binje det toneñ yirtiñ goyen galak yirtiñ gobe det kurunñ geb gogo dineñ hi yeñ nurde hañ? Irde al beleñ det toneñ yirtiñ goyen doloñ yirde hanjen gobe det kurunñ wor pobe gogo yeñ nurde hañ? ²⁰ Moñ! Al Kurunñ niñ ma nurde hañ mar beleñ megen niñ det toneñ yirde galak yirde hanjen binje gobe unğura galak yirde hanjen, Al Kurunñ ma galak irde hanjen. Niñgeb denbe unğuraya awalikde ma hiwoñ yeñ nurde hime. ²¹ Denbe Doyañ Al Kurunñ kamyiñ goke dufay hen hen ge wain fimiñ nene hanjen. Niñgeb den go mar gore po unğura niñ nurde doloñ yird yird gasunde kuñ gor niñ wain ma nenayiñ. Denbe Doyañ Al Kurunñ kamyiñ goke dufay hen hen ge binje nene hanjen. Niñgeb den go mar gore po kuñ unğura doloñ yird yird gasunde niñ binje goyen ma nenayiñ. ²² Neñbe Doyañ Al Kurunñ beleñ biñ ar wor po yiwi yeñ kuñ unğura galak yirtiñ binje netek? Nende tarenbe Doyañ Al Kurunñyen taren folek geb, epte ma buluñ diryen yeñ nurde gwaha tenj hitek? Epte moñ.

Al Kurunñ turuñ irde hitek

²³ Be, den hañ bana al kura beleñ, “Neñbe mata kura tiniñ yeñbe igiñ ala titek,” yeñ hanjen. Gega mata go tinayiñ gore hugiñen igiñ dirnayiñ yeñ ma nurde hinayiñ. Niñgeb nebe mata kura

tiye yenbe igin ala tiyen gega, mata gore epte ma nanarde bon yiyyen. ²⁴ Gwahade ningeb det kura dindiken igin dird dird goke ma nankenen hinayin. Gwaha titnenbe det kura kadtin igin yirtek goke nankenen hinayin.

²⁵ Ningeb maketde kun igin dapna damu ten nene hinayin. Goyenbe mata bulun tihit yen nurtek dufay ma forok yen yen ge tenbe, “Binje gabe unqura galak yirtin we?” yen gusunan ma yirde mali po damu ten nene hinayin. ²⁶ Megenya det kurun megen han tumnan goyenbe Doyan Al Kurunyen ala po geb, gogo igin ala nene hinayin. ²⁷ Ningeb al kura Yesu nin ma nurtin gore dula ten ten nin hoy dirke kunin yen nurdeb kun yenya binje nenayin. Gega mata bulun tihit yen bitinde kanduknen nurtek dufay ma forok yen yen ge tenbe, “Binje gabe unqura galak yirtin?” yen gusunan ma yirnayin. ²⁸ Munan al kura belen, “Binje gabe unqura galak irtin,” dinkeb ma nenayin. Gogab al kura gwaha dinyen al gote dufay bulun ma irnayin, irde mata bulun tihit dufay wor forok ma yiyyen. ²⁹ Mata bulun tihit dufay binde mat forok yen yen ge yen hime gobe dende nin ma yen hime, al hoyande nin goke yen hime.

Be, goyenbe al kurabe gaha yen hanjen: “Nenbe bininde mat wukken wor po nurdeya mata kura igin ala titek. Gega danin al hoyan belen denenbe mata bulun tahan yen dennak yen kama henbe gwaha ma tinin? ³⁰ Nenbe binje kura goke Al Kurun igin nurde unen gab nene hitek gega, danin al hoyan belen binje netek goke

ulniniŋde merem yaŋ dirnayıŋ? Goke igiŋ ma nurde hite,” yeŋ haŋyen.

³¹ Niŋgeb mere gwahade gokeb gaha diŋeŋ: biŋge ma fe yara kura ninıŋ yeŋbe Al Kurun deŋem turuŋ yaŋ hiyyeŋ mat nene hinayıŋ. Niŋgeb mata kura tiniŋ yeŋ nurde hinayıŋ goyenter wor Al Kurun deŋem turuŋ yaŋ hiyyeŋ mat po mata teŋ hinayıŋ. ³² Mata teŋ hike Yuda mar al kura ma Grik mar al kura ma Yesuyen alya bereya bana go niŋ al kura beleŋ deneŋbe dufaymiŋ buluŋ heke mata buluŋ tinak geb, matabe nurdeya ga teŋ hinayıŋ. ³³ Ne wor meteŋ teŋ kuŋ himyen kurun gobe al tumŋaŋ matane keneŋ amaŋeŋ nurnayıŋ mat mata teŋ himyen. Gwaha teŋ himyen gobe nigeŋ igiŋ heŋ heŋ niŋ ma gwaha teŋ himyen. Al hoyaŋ budam igiŋ heŋ heŋ niŋ gwaha teŋ himyen. Gogab yeŋ goyen Al Kurun beleŋ yumulgaŋ tiyyeŋ yeŋbe gwaha teŋ himyen.

11

¹ Niŋgeb ne beleŋ Yesu Kristuyen mata po gama irde himyen gwahade goyen po, deŋ wor ne mata teŋ himyen gayen gama irde hinayıŋ.

Bere tonaŋ aw yurd yurd mata

² Be, deŋbe haŋyen kurun goyen hugiŋeŋ ne niŋ bitiŋ sir ma yeŋ hi. Irde neŋ Yesuyen alya bereya beleŋ teŋ hityen mata goyen momoŋ dirmiriŋ goyen gama po irde haŋ. Niŋgeb goke turuŋ dirde hime.

³ Goyenbe saba kura deŋ beleŋ keŋkela nurwon yeŋ nurde hime. Saba gobe gahade: al tumŋaŋ

gote doyanj albe Yesu Kristu, irde berer doyanj marbe unj yago. Yesu Kristuyen doyanj albe Al Kurunj. ⁴ Ningeb denj hanj bana goyen al kura belenj Yesuyen alya bereya gabu irde hinayinde gor henj bere belenj tenj hanjen yara amil tenj tonanj aw urde Al Kurunj mere iryenj irde kurabe Al Kurunjen mere basanj al porofet yara mere tiyyenbe al goreb Doyanj Alminj Yesu Kristu denjem bulunj iryenj. ⁵ Irde denj hanj bana goyen bere kura belenj Yesuyen alya bereya gabu irde hinayinde gor al belenj mata tenj hanjen yara amil tenj tonanj aw ma urde Al Kurunj mere iryenj irde kurabe porofet yara mere tiyyenbe bere goreb doyanj alminj unj goyen denjem bulunj iryenj. Bere go tonanj aw ma uryenj gobe tonanj walde kara tiyyenj go gwahade yara geb, memyak wor po. ⁶ Ningeb bere kura Al Kurunj doloj irninj yenj gabu irnayinde tonanj aw ma urde kuyenj gobe bere gote tonanj yuwalhenj walde kara tiyyenj. Munanj tonanj gwaha iryenj gobe memyak yenj nurdeb bere gobe tonanj aw urde kuyenj. ⁷ Goyenbe albe Al Kurunj belenj yingenj yara iryinj, irde sanjminj turnunj yanj goyen al hitte mat kawan henj hi, irde bere hitte matbe alyen tarenminj turnunj yanj goyen kawan henj hi geb albe tonanj ma aw uryenj. ⁸ Fudinde, hanj kopya wor po albe bere hitte mat ma forok yirinj, berebe al hitte mat forok yirinj. ⁹ Albe Al Kurunj belenj bere ninj tenj ma iryinj. Al ninj tenj bere gogo iryinj. ¹⁰ Ningeb berebe amil belenj tonanj aw urtinde hiyenj. Gwaha tenj hiyenbe bere go al kurat yufukde hi yenj kennayinj. Al Kurunjen miyonj

wor gwahade kennayiñ. ¹¹ Goyenpoga mere dirhem gabe berebe det dirñeñ, munañ albe det kurun yeñ ma dinhem. Neñ Doyañ Al Kurun nurd untiñ mar bana alya bereyabe tunande po. Niñgeb berebe al ma hike yeñ unjkuren po epte ma hiyeñ, al wor bere ma hike yeñ unjkuren po epte ma hiyeñ. ¹² Berebe al hitte mat forok iryiñ gwahade goyen po, al wor bere hitte mat forok yeñ hanjen. Gega alya bereya tumñañ gobe Al Kurun beleñ po yiryiñ.

¹³ Niñgeb Al Kurun doloñ irniñ yeñ gabu irde hinayiñde gor bere kura tonañ aw ma urdeya Al Kurun mere iryeñ gobe igiñ ma bulun goyen dindiken gab kenkela dufay henbe yenayiñ. ¹⁴ Det Al Kurun beleñ yiryiñ kurun gayen gate matare wor al kura tonañ yuwalñeñ sobam hen bereyen tonañ yara hiyyeñbe gobe igiñ moñ, memyak yeñ nurde hite. ¹⁵ Gega bere tonañ yuwalñeñ sobam hiyyeñbe igiñ hoyañ yeñ nurde hite. Tonañ yuwalñeñ sobam gobe bere gote tonañ aw yurd yurd niñ Al Kurun beleñ iryiñ. ¹⁶ Al ma bere kura mere tihim gake igiñ ma nurdeb neya kadom mohonde titek wet yeñ nurnayiñ. Goyenpoga neñ banabe mata gwahade gobe hubu wor po. Yesuyen alya bereya Al Kurunyen dirñeñ wenbe mata gwahade goyen ma teñ hanjen.

Yesu kamyiñ goke dufay hen hen niñ dula teñ teñ mata kenkela teñ hinayiñ

¹⁷ Be, denbe Yesu kamyiñ goke dufay hen hen niñ gabu irde dula teñ hanyende gorbe dindiken bulun hetek mata teñ hanjen. Munañ igiñ hen hen matabe kura ma teñ hanjen, hubu wor po.

Niṅgeb goke turuṅ ma dirde hime, irde gago saba direṅ tihim. ¹⁸ Meheṅde mere direṅ tihimbe gahade: deṅbe Yesuyen alya bereya gega, gabu irde haṅyen bana goṅbe mata kura kukuwam mat tike gore bipti forok irde hi yeke nurde himyen. Mere gobe tumṅaṅ usi yeṅ ma nurde hime. ¹⁹ Fudinde, ganuṅbe Al Kuruṅ diliṅde huwak hi, irde ganuṅbe gwahade moṅ goyen kawan heṅ heṅ ge teṅ deṅ haṅ bana goṅ dufaytiṅ muṅ kura hoyan hoyan hinayiṅ goyen epte ma teṅ siṅa irtek yeṅ nurde hime. ²⁰⁻²¹ Goyenpoga deṅ bana goṅ bipti forok yitiṅ goke diṅeṅ hime gabe deṅ gabu irde Doyaṅ Al Kuruṅ kamiṅ goke dufay heṅ heṅ ge biṅge nene haṅ goyenter kadtiṅ ge ma doyaṅ heṅbe dindikeṅ ge po nurde dula teṅ haṅ geb, gago diṅeṅ hime. Gwaha teṅ hikeb kurabe biṅge kamde hikeb kurabe wain kuruṅ nene kukuwa heṅ haṅ. Niṅgeb deṅbe, “Doyaṅ Al Kuruṅ kamiṅ goke dufay heṅ heṅ ge biṅge nene hite,” yeṅ nurdeya biṅge nene haṅ gega, gwahade moṅ yeṅ nurd duney hime. ²² Goyenbe deṅ goyen biṅgeya feya nen nen yatiṅ miṅmoṅ geb, gogo gabure gor po waṅ gab gwaha teṅ haṅyen? Gwahade moṅ kenem Al Kuruṅyen dirṅeṅ weṅ Yesuyen alya bereyabe det dirṅeṅ yeṅ nurde mali mali yirde haṅ? Irde bana goṅ niṅ alya bereya kura horam moṅ mar goyen gwaha yirteke yiṅgeṅ bunineṅ yirde memya henaṅ mat mata teṅ haṅ? Niṅgeb matatiṅ goke daha diṅeṅ? Matatiṅ goke turuṅ direṅ? Epte moṅ!

²³ Be, hakot dula mata goke Doyaṅ Al Kuruṅ belēṅ ninke ne wor momoṅ dirmiriṅ. Mere

gobe gahade: Doyaŋ Al Kurun Yesu goyen Yudas belej asogom haniŋde kerenj tiyyinj wawun goya goyenbe Yesu belej beret kura tirinj. ²⁴ Irdeb beret goke Al Kurun turun irde ubala tenbe, “Beret dunhem gahade gayen po, nebe den ge ten kamenj. Niŋgeb goke tenbe beret gabe gasonne geb, beret ga ten nenanj. Irde kame den wor ne niŋ bitinj bak yen yen ge ten mata gahade ga po ten hinayinj,” yirinj. ²⁵ Irde beret go neneb wain fimiŋ tenbe beret ten yirinj gwahade po, “Al Kurun belej mata bulunŋinj halde halde niŋ ten biŋa gergenj tiyyinj goke darine wok yiyyenj. Niŋgeb goyen goke wain gago dunhem geb, ten nenanj. Irde kame den wor ne niŋ bitinj bak yen yen ge ten mata gahade ga po ten hinayinj,” yirinj. ²⁶ Niŋgeb gabu irde dula gwahade ten wain nen nen mata tiniŋ yenbe gwaha mat Doyaŋ Al Kurun belej alya bereyat mata bulunmiŋ ge ten kamiŋinj goke al hoyan momonj yirde hinayinj. Gwaha tike kunj kunbe kame Doyaŋ Al Kurun wayyenj.

²⁷ Niŋgeb al kura Doyaŋ Al Kurunjen biŋgeya wainya nene henya Doyaŋ Al Kurunjen alya bereya belej dufay henj mata ten hanjen mat ma nurdeya niyyenj al gobe Yesu belej ulinj misiŋ katenj darim wok irde kamiŋinj goyen kari kari iryenj geb, Al Kurun belej goke mata bulun miŋyanj yen kinyenj. ²⁸ Niŋgeb al kura Doyaŋ Al Kurunjen biŋgeya wainya newen yen nuryen al gobe yinŋenŋe mataya dufayya kenkela yenenj gab niyyenj. ²⁹ Munan al kura gwaha ma ten biŋgeya wainya gobe Doyaŋ Al Kurun kamiŋinj gote tunanjen yen ma nurde ga mali niyyenj

al gobe gote murungem bulun wor po tiyyen.
³⁰ Gwahade geb, den han bana gonbe al kura marbe yulkek han, kurabe garbam minyan, irde kuratinbe kaman gogo. ³¹ Gega nenbe dahade hite yen nindiken kenkela dufay hen mataninin sope irde hitekbe mata bulun gote murungem bulun ma tetek. ³² Gega kurarebe Doyan Al Kurun belen mataninin goke kanduk dunen hiyen. Gwaha ten hiyen gobe megen henya mataninin huwak hen hikeb kame nalu funande mata bulun marya tumnan huginen Al Kurunyen bearar bana hinak yenbe gogo gayenter kanduk dunen hiyen.

³³ Ningeb, kadne yago, Doyan Al Kurun nin dufay hen hen ge gabu irde dula tinin yenbe kadam doyan gird ten hinayin. ³⁴ Al kura binje irkeb yaminde dula ten gabe Doyan Al Kurun nin dufay hen hen dula gabure wayyen. Gogab den gabu irde hinayin bana gon mata bulun Al Kurun belen goke murungem bulun duntek goyen ma forok yiyyen. Be, Doyan Al Kurun nin dufay hen hen ge dula ten ten mata nin dinhem. Mata goke mere ma dirhem kura han gobe kame den hitte kun gab momon diren.

12

Holi Spirityen saninde mata forok yen yen

¹ Be, kadne yago, Holi Spirityen tarende mata forok yen yen goke momon diren tihim. Holi Spirityen tarende mata forok yen yen goke bebak ma titinde po hinak yen igin ma nurde hime geb, kenkela bebak tinayin. ² Be, denbe hakot Yesu ma nurde unen hin hanyabe megen nin det tonen

al beley po yirtin binfut minmon gote yufukde hen huginen doloj yirde hinhan gobe nurde han gogo. ³ Ningeb ga kenkela nurnan ko. Al kura Holi Spirit minyan beley epte ma, “Yesube Al Kurun beley karan urwon,” yiyyen. Irde al kura Holi Spirit minmonbe epte ma, “Yesube Doyan Al Kurun,” yiyyen. Holi Spirit minyan al beley po gab epte gwaha yiyyen.

⁴ Be, Holi Spirityen saninde mata forok yen yen gobe budam kurayen kurayen han gega, mata gote min albe Holi Spirit, yen unkuwen po. ⁵ Doyan Al Kurunyen metenbe budam han gega, meten gote min albe Doyan Al Kurun, yen unkuwen po. ⁶ Irde meten ten ten taren wor kurayen kurayen han gega, meten titek taren gote min albe Al Kurun, yen unkuwen po. Yen beley po gab nen tumnan metenmin kurun goyen igin ten hitek sanin goyen dunen hiyen.

⁷ Be, nen dunkuwen dunkuwen hitte Al Kurun beley Holi Spirityen taren kawan forok irde hi gobe nen tumnan taren dird dird nin gogo forok irde hiyen. ⁸ Al kurabe Al Kurun beley Holi Spirit hitte mat dufay wukke yunen hiyen. Munan al hoyan kurabe Holi Spirit unkuwen goyen hitte mat po Al Kurunyen dufay banare nin goyen yunen hiyen. ⁹ Irde al kurabe Holi Spirit unkuwen goyen hitte mat po Yesu nin heken wor po nurtek sanin go yunen hiyen. Irde al hoyan kurabe Holi Spirit goyen hitte mat po al garbam minyan sope yird yird taren yunen hiyen. ¹⁰ Irde al kurabe mata tinen tonnen yan wor po forok yird yird taren yunen, al hoyan kurabe Doyan Al Kurunyen mere

basan̄ heñ heñ mar yirde hiyen. Munan̄ al kurabe mataya mereya kura kenen̄be gobe Holi Spirit hitte mat watiñ ma un̄gura hitte mat watiñ goyen bebak teñ teñ san̄iñ yunen̄ hiyen, irde al hoyan̄ kurabe nan̄a hoyan̄de niñ mere kurayen kurayen yin̄gen̄be go ma nurtiñ mere teñ teñ taren̄ yunen̄ hiyen. Munan̄ kurabe mere hoyan̄ mat yekeb mere gote miñ tagal tagal taren̄ yunen̄ hiyen. ¹¹ Mata gwahade forok yeñ han̄yen kurun̄ gobe Holi Spirit, yeñ un̄kuren̄ gote meten̄. Holi Spirit hoyan̄ gam mon̄. Yeñ belen̄ san̄iñmiñ kurayen kurayen goyen dufaymiñ po gama irde neñ gayen nende gigen forok yird dunen̄ hiyen.

Neñbe hoyan̄ hoyan̄ gega, Holi Spiritbe un̄kuren̄

¹² Be, al uliñ pigin̄be un̄kuren̄ gega, han̄iñ, kahan̄, kirmiñ, murun̄ gwahadem yan̄ han̄. Irde han̄iñ, kahan̄, kirmiñ, murun̄ gwahade han̄ gore gab al uliñ pigin̄ un̄kuren̄ forok irde hi. Niñgeb Yesu Kristu wor gwahade yara geb, neñbe yende kahan̄, han̄iñ, kirmiñ, murun̄ gwahade hite.

¹³ Neñbe al miñ hoyan̄ hoyan̄. Kurabe Yuda mar, kurabe Grik mar. Irde kurabe al yufukde heñ murun̄gem mon̄ meten̄ teñ han̄ mar, kurabe dufaymiñde kun̄ han̄ mar. Goyenbe neñ tumñan̄ Holi Spiritde baptais dirke Yesu Kristuyen uliñ pigin̄ yara hitiñ. Irde Holi Spirit, yeñ un̄kuren̄ gore po neñ dun̄kuren̄ dun̄kuren̄ bana hi. Holi Spirit hoyan̄ gam mon̄.

¹⁴ Al uliñ pigin̄be det un̄kuren̄ belen̄ po ma irtiñ hi. Kahan̄, han̄iñ, kirmiñ, murun̄ gwahade gore irke gab al uliñ pigin̄ un̄kuren̄ hitiñ. ¹⁵ Goyenbe al kurat kahan̄ belen̄, “Nebe al gate han̄iñ mon̄

geb, al gate uliñ moñ,” yiyyenbe kahañ gob al gote uliñ piginñde ma hiyen? Moñ, epte moñ. Yenbe al gote kahañ geb, uliñde po hiyen. ¹⁶ Gwahade goyen po al kurat kirminñ beleş, “Nebe al gate diliñ moñ geb, al gate uliñ moñ,” yiyyenbe kirminñ gobe al gote uliñ piginñde ma hiyen? Moñ, epte moñ. Yenbe al gote kirminñ geb, uliñde po hiyen. ¹⁷ Niñgeb ulniniñ gayen dilniniñ ala po manhan daha mat mere nurde hitewoñ? Irde ulniniñbe kirminñniniñ ala po manhan daha mat det hamiñ nurde hitewoñ? Gobe kukuwamñenñ wor po. ¹⁸ Goyenbe Al Kurunñ beleş dufayminñ gama irde al ire yenbe kahañya haniñya yirde kirminñya diliñya manañ yirde al unñkurenñ iryiñ. Niñgeb neñ wor gwahade po diriñ. ¹⁹ Gega det unñkurenñ beleş po al irtiñ manhan uliñ piginñbe dahade hiwoñ? ²⁰ Gega gwahade moñ. Ulniniñde det hoyañ hoyañ yirde ulniniñ piginñ unñkurenñ po irtiñ.

²¹ Niñgeb al kurate diliñ beleş al gote haniñ kenenñbe epte ma, “Nebe geya hitek ma nirde hi,” inyen. Tonañ beleş kahañ kenenñbe epte ma, “Nebe geya hitek ma nirde hi,” inyen. ²² Gwahade yarabe ulniniñde det kura yenenñminñbe metenñ minñmoñ yenñ nurde hitek goyenbe go ma hinayiñbe ulniniñbe kenñkela ma metenñ tenñ hiyyen. ²³ Niñgeb ulniniñde det kura yenenñminñbe metenñ minñmoñ yenñ nurde hityen goyen det kurunñ yenñ kenñkela doyañ yirde hityen. Irde ulniniñde det kura yenenñminñbe iginñ moñ gega, kenñkela po umña yirde doyañ yirde hityen. ²⁴ Goyenbe ulniniñde det kura yenenñminñ iginñ gobe umña ma yirtek wor iginñ. Niñgeb Al Kurunñbe ulniniñde det kura

miŋ miŋmoŋ yirtin yenen hanjen goyen meten kura yune yenbe go wor yade ulniniŋde niŋ det hoyanya gabu irde uliŋ piŋiŋ unkuŋen iryiŋ. Al Kurunbe gwaha mat ulniniŋde det kura miŋ miŋmoŋ yen yenen hanjen goyen turun yirde hiyen. ²⁵ Gogab ulniniŋde det kurate dufayya det hoyan kurate dufayya hoyan hoyan heke kahalte bipti ma forok yiyyen. Irde ulniniŋde det gore kadam ge nurdkakala ten hinayiŋ. ²⁶ Niŋgeb ulniniŋ kurhan kura misiŋ katyen gobe ulniniŋ piŋiŋ kurun go tumnan misiŋ nuryen. Gwahade goyen po, ulniniŋ kurhan kura denem turun yan hen aman hekeb ulniniŋ piŋiŋ kurun go manan tumnan aman hiyyen.

²⁷ Be, gwahade goyen po, denbe Yesu Kristuyen uliŋ piŋiŋ yara. Den dunkuŋen dunkuŋenbe Yesuyen kahan, haniŋ, diliŋ, kirmiŋ gwahade yara. ²⁸ Niŋgeb den Yesuyen alya bereya sios han bana gon mehenbebe Al Kurun belen Yesuyen mere basan mar aposel basiŋa yirtin han. Irde go yufukdebe Al Kurunyen mere basan mar porofet basiŋa yirdeb Al Kurunyen mere saba mar basiŋa yirtin han. Irde gab mata tiŋen turun yan forok yird yird mar basiŋa yirdeb al garbam miŋyan sope yird yird mar wor basiŋa yirdeb al faran yurd yurd mar basiŋa yirtin han. Irdeb Yesuyen alya bereya doyan yird yird mar basiŋa yirdeb nana hoyande niŋ mere kurayen kurayen go ma nurtin goyen mere ten han mar basiŋa yirtin han. ²⁹ Niŋgeb den tumnanbe aposel henayiŋ? Ma, tumnan porofet henayiŋ? Irde den tumnan Al Kurunyen mere saba mar henayiŋ?

Ma, tumṇaṇ mata tiṇeṇ turṇuṇ yaṇ forok yird yird mar henayiṇ? ³⁰ Deṇ tumṇaṇ al garbam sope yird yird mar henayiṇ? Ma, tumṇaṇ naṇa hoyande niṇ mere go ma nurtiṇ goyen teṇ teṇ mar henayiṇ? Irde deṇ tumṇaṇ mere goyen tigiri teṇ al bebak yird yird mar henayiṇ? Epte moṇ geb. ³¹ Goyenbe Holi Spirityen tareṇ kura igiṇ wor po goyen goke momoṇ direṇ tihim geb, deṇ tumṇaṇ mata go teṇ teṇ niṇ kurut wor po yeṇ hinayiṇ. Mata gobe Holi Spirityen tareṇde mata forok yeṇ hanṇyen hoyaṇ kuruṇ gote folek wor po.

13

Al hoyaṇ niṇ amaṇeṇ nurd yuneṇ yuneṇ mata

¹ Be, ne gayen naṇa hoyande niṇ marte mere kurayen kurayen goyen igiṇ gwaha mat mere tiyeṇ, irde Al Kurunṇyen miyoṇyen mere mat manaṇ mere tiyeṇ gega, Al Kurunṇya al hoyanya niṇ amaṇeṇ nurd nurd matanem moṇ kenem nebe heyoṇonya tikiṇde niṇ det ain parwek belen irtiṇ goyen mali po gasa yirke migiriṇ teṇ hanṇyen go gwahade goyen heweṇ. ² Irde Al Kurunṇyen mere basaṇ heṇ mere teṇ teṇ saṇiṇne yaṇ heweṇ, irde Al Kurunṇyen mere banare hitiṇ tumṇaṇ nurde dufaymiṇ tumṇaṇ bebak teṇ tagaleṇ, irde Al Kurunṇ niṇ hekkeṇ wor po nurdeb dugu kura gasuṇ hoyande kwa inmeke kuyeṇ gega, Al Kurunṇya al hoyanya niṇ amaṇeṇ ma nureṇ kenem mata gobe duldul teṇ heṇ. ³ Irde detne tumṇaṇ al det niṇ amu heṇ haṇ mar goyen yuneṇ, irde Doyaṇ Al Kurunṇ gama ird ird niṇ teṇ al belen kakde kunga nirke kamenṇ gega, kadne niṇ

amañeñ nurd nurd matanem moñ kenem mata gwaha teñ heñ kurun gote murun gem kura ma tewen.

⁴ Be, al kura binde mat wor po kadomya Al Kurunya nin amañeñ nurd unen unen matabe gahade: al gobe kadam kura matamin igin hewon yen doyan heñ heñ ge pinen ma heñ hiyen. Kurabe kadam igin igin yirde hiyen. Irde kadam kura igin mat hike keneñbe danin ne wor gwahade moñ yen ma nurde hiyen. Irde ne harhem harhem mata ma teñbe yingen ge turun turun ma teñ hiyen. ⁵ Irde kadam hitte palap min moñ mata ma teñ hiyen. Irde yingen po igin heñ heñ belnen nin ma nankenen hiyen, irde arañen bearar ma teñ hiyen. Irde kadam belen bulun irtin goyen goke dufay ug po ma heñ hiyen. ⁶ Al gobe mata bulun nin amañeñ ma nurde hiyen, irde mere fudinde goke po amañeñ nurde hiyen. ⁷ Al gobe kanduk yenen hiyen goke mukku ma teñ huginen taren po heñ hiyen. Irde Al Kurun nin huginen heken nurde hiyen, irde Al Kurun belen igin niryen yen goke huginen doyan heñ hiyen, irde kanduk yenen hiyen gega taren po heñ fole yirde hiyen.

⁸ Kadomya Al Kurunya nin amañeñ nurd yunen yunen mata gobe hubu ma hiyen. Goyen-poga porofet metenbe hubu hiyen. Irde nana hoyande nin mere mat mere teñ teñ mata goyen wor kamyen. Al Kurunyen dufay bebak teñ tagal tagal meten wor hubu hiyen. ⁹ Gobe gayenter Al Kurunyen dufay tumnan bebak titek epte moñ, irde meremin manan tumnan bebak teñ basan heñ tagaltek epte moñ gega, ¹⁰ kame nalu

funañdebe neñ tumñañ Al Kurunyen dufayya mereya kenkela wor po bebak titek geb, go mata gobe tumñañ hubu henayin dinen hime gago. ¹¹ Mata gwahade forok yiyyen gobe bikken dirin hinhemya dirinde mere ten dufaynebe dirinde dufay po hen hinhem gega kuñ kuñ salanñen henbe dirinde mataya dufayya gobe yubul po timirin go gwahade goyen. ¹² Irde gayenterbe Al Kurunyen mereya dufayya bebak wor po ma ten hite. Gobe lunen ain parwek beñ irtin gore dinsokninin kinnin gega, kenkelak ma kenen hite go gwahade goyen. Goyenbe kamebe dilnininde kadam geneñ ten hite yara Al Kurunyen mereya dufayya kenkela wor po bebak ten hitek. Niñgeb gayenterbe Al Kurunyen mereya dufayya kura muñ po bebak ten hime gega, kamebe tumñañ bebak tiyen. Goyenterbe Al Kurun beñ kenkela wor po nurd nunen hiyen gwahade po, ne wor kenkela nurd unen hen.

¹³ Be, yihim gwahade po mata hoyanbe hubu henayin gega, mata karwo kurabe hubu ma wor po henayin. Mata karwo gobe gahade: Yesu nin heken nurd nurd mata, Al Kurun beñ igin diryen yen goke doyan hen hen matayabe Al Kurunya kadininya nin amanen nurd yunen yunen mataya gogo. Goyenbe mata karwo bana goyen folek wor pobe Al Kurunya kadininya nin amanen nurd yunen yunen mata gogo.

14

Porofet metenya nana hoyanbe nin mere mat mere ten ten mataya

¹ Niŋgeb Al Kurunya kadtinya niŋ amanen nurd yunen yunen mata gobe gama po irde hinayin. Irdeb Holi Spirityen saŋinde mata forok yen yen goyen goke Al Kurun belen dunwoŋ yen taren po gusunan irde hinayin. Gega porofet meten gobe det kurun geb, goyen dunwoŋ wor po yen gusunan irde hinayin. ² Porofet meten niŋ wa gusunan irde hinayin dinen hime gote miŋbe gahade: al kura naŋa hoyande niŋ mere kurayen kurayen ten hiyen al gobe al ma mere yirde hiyen, Al Kurun mere irde hiyen. Yenbe Holi Spirityen tarende mere banare niŋ goyen ten hiyen. Niŋgeb meremin goyen al hoyan kura belen bebak titek moŋ. ³ Goyenpoga porofet meten ten han marbe tumnan al saŋin yird yird niŋ mere yirde hanjen. Niŋgeb kadam kura taren hen hen ge faran yurde, biŋ yurum yirde hanjen. ⁴ Be, al kura naŋa hoyande niŋ mere ten ten mata ten hiyen al gobe mata gore yingen po taren irde hiyen. Munan porofet meten ten hiyen al gobe meten gore kadam Yesuyen alya bereya saŋin yirde hiyen. ⁵ Niŋgeb meten gobe naŋa hoyande niŋ mere mat mere ten ten mata gote folek. Goke tenbe den tumnan naŋa hoyande niŋ mere mat mere ten ten mata ten hiwoŋ yen nurde hime gega, porofet meten niŋ wa gusunan irke dunkeb meten goyen ten hiwoŋ yen nurde hime. Naŋa hoyande niŋ mere mat mere ten ten mata gobe mere gote miŋ goyen tigiri ten Yesuyen alya bereya momon yirke taren hetek al miŋyan hike kenem gwaha tiyyen. Munan hubu kenem hoyande niŋ mere ten ten mata gote iginenbe

porofet meten gote iginen epte ma fole iryen.

⁶ Be, kadne yago, den hitte kuñ naña hoyande nin mere mat mere tiyenbe daha mat faran duren? Epte mon wor po! Gwahade tiyen gega, Al Kurunyen dufay banare nin nikala nirke kawan momon dird dird mata, Al Kurunyen dufay bebak ten tagal tagal mata, porofet meten goyen ten ten matayabe sabamin tagal tagal mataya goyen gonem mon henya den hitte kuñ faran duren gobe iginen ma forok yiyyen. ⁷ Gobe tikiñde nin det bulelunya gitaya gwahade yara. Gobe binfut minmon gega, al beñ kari yirke mere ten hanen. Goyenbe kenkela ma kari yirke mereminbe hiburnen geb, tikiñ damin hen han yen ma bebak tinayin. ⁸ Be, al kura fulenare kuñ kuñ nin ten bigul fu iryen gega, kenkela ma fu irke fulenare mar kadom beñ daha matbe bebak tenbe fulenare kuñ kuñ nin gitik tinayin? Epte mon. ⁹ Nin geb gwahade goyen po, den beñ mere ten henya naña hoyande nin mere kura kadtin epte ma bebak titek mere mat tinayinbe dahadem kadtin beñ meretin nurde bebak tinayin? Epte mon. Gwaha tinayinbe mere gobe dulin lawlaw yen han yen nurnayin. ¹⁰ Fudinde wor po, megenbe nen beñ epte ma bebak titek mere kurayen kurayen budam han. Gega mere gobe tumnan min minyan. ¹¹ Goyenbe mere hoyan kura ne beñ epte ma bebak titek goyen al kura beñ tiyyenbe nebe meremin gote min ma nuren geb, mere ten hi al hittebe al min hoyan hewen. Irde al gobe ne hitte al min hoyan hiyyen. ¹² Gobe den wor gwahade po yen nurde han. Denbe Holi

Spirityen tarende mata forok yird yird sañin tetek wor po nurde hanjen geb, tareñmin go teñ gabe kadtin Yesuyen alya bereya sañin yird yird nin kurut wor po yen hinayin.

¹³ Niñgeb goke teñbe al kura naña hoyande nin merere mat mere teñ hiyen al gobe mere tiyyen gote min kawan tagal tagal nin manan Al Kurun gusunan iryen. ¹⁴ Fudinde, naña hoyande nin merere mat Al Kurun mere ireñ goya goyenbe tonner mere ireñ gega, dufaynerbe mere gwaha tihim yen ma nuren. ¹⁵ Niñgeb daha tiyen? Nebe tonner Al Kurun mere ireñbe dufayner wor mere ireñ. Irde tonner Al Kurun nin tikiñ hewenbe dufayner wor tikiñ hwen. ¹⁶ Munan denbe tontinde po Al Kurun turun irnayinbe den han bana goyen al kura meretin bebak ma teñ hiyen al gobe den belen Al Kurun igin nurd unen turun irde han goke epte ma faran durde “Fudinde,” yiyyen. Al gobe mere teñ han gote min ma bebak teñ hiyen geb, gogo epte ma haywan hiyyen. ¹⁷ Denbe Al Kurun mere irde henya igin mat po turun irde hinayin gega, al hoyan meretin bebak ma teñ hinayin marbe meretin gore epte ma faran yuryen.

¹⁸ Nebe naña hoyande nin merere mat Al Kurun mere ird ird matanebe kurun wor po, den teñ hanjen gote folek. Niñgeb goke Al Kurun igin nurd unen hime. ¹⁹ Nebe gwahade po naña hoyande nin mere mat Al Kurun mere ird ird mata tareñ po tanarde himyen gega, Yesuyen alya bereya gabu irde hanjen bana gon henbe al hoyan belen igin bebak titek mere mat po mere

teñ al saba yirde himyen. Al hoyañ beleñ igin bebak titek mere mat saba yireñ kurun gobe gote igineñ minyan. Gega naña hoyande niñ mere kadne beleñ epte ma bebak titek gore po ugun po saba yireñ gobe igineñ gam mon, miñ minmon wor po hiyyen.

²⁰ Niñgeb, kadne yago, naña hoyande mere mat Al Kurun mere ird ird mataya porofet meten teñ teñ mataya goyen teñ henyabe dirin kalak beleñ dufay hen hanyen gwahade ma teñ hinayin. Goyenbe dirin mamure niñbe mata bulun teñ teñ niñ ma nurde han. Niñgeb bulun teñ teñ niñbe yen yara hen hinayin. Gega dufay hen heninbe al paruwak beleñ dufay hen hanyen yara hen hinayin. ²¹ Al kurunyen asande naña hoyande niñ merere mat Al Kurun mere ird ird mata goke Doyan Al Kurun beleñ gaha yirin:

“Ne beleñ al miñ hoyañ, irde meremin manañ hoyañ goyen dufay yunmeke mel gayen momon yirnayin.

Gwahade yireñ gega merene ma nurnayin,” yitin hi.

Aisaia 28:11-12

²² Niñgeb naña hoyande niñ mere mat mere teñ teñ mata gobe Doyan Al Kurun niñ ma nurtin mar hittebe Al Kurunyen sanin bebak teñ teñ niñ forok yen hanyen. Munan Doyan Al Kurun niñ dufaymin taren irtin mar hittebe gwahade mon. Goyenbe porofet meten teñ teñ matabe Doyan Al Kurun niñ dufaymin taren irtin mar hittebe Doyan Al Kurunyen buninen dufay goyen bebak teñ sanin hen hen ge forok yen hanyen. Munan Doyan Al Kurun niñ ma nurtin mar hittebe gwahade mon. ²³ Goyenpoga Yesuyen alya

bereya sios tumṇaṇ gabu irde naṇa hoyanḍe niṇ mere mat Al Kurunḍ mere irde hikeya al kura Al Kurunḍen mere biṇḍe tareṇ ma hitiṇ mar ma al kura Doyaṇ Al Kurunḍ niṇ ma nurtiṇ mar beleṇ waṇ denenḍe daha dinnayiṇ. Kukuwa hahanḍ po ga dinnayiṇ geb. ²⁴ Goyenḍe tumṇaṇ Al Kurunḍen mere basanḍ heṇ tagalde hikeya al kura Doyaṇ Al Kurunḍ niṇ ma nurtiṇ mar ma Al Kurunḍen mere biṇḍe tareṇ ma hitiṇ mar kura beleṇ waṇ mere go nurnayiṇḍe mere nurnayiṇ kurunḍ goreb mata bulunḍmiṇ kawan yirde biṇ yakamkeḍ, “Fudinde, nenḍe mata bulunḍ mar,” yeṇ nurnayiṇ. ²⁵ Al Kurunḍen mere basanḍ heṇ heṇ mata gore go mar gote dufaymiṇ banare po hitiṇ goyen kawan yiryenḍ. Irkeḍ mel gore dokolhoṇ yugulunḍ teṇ Al Kurunḍ dolonḍ irde kawan po, “Fudinde, Al Kurunḍe denḍya hi!” yenayiṇ.

Igiṇ mat Al Kurunḍ dolonḍ ird ird mata

²⁶ Niṇḍeḍ, kadne yago, gabu irde Al Kurunḍ dolonḍ ird ird mata niṇ daha yewenḍ? Be, Al Kurunḍ dolonḍ irniṇ yeṇ gabu irdeyabe al kurabe tikiṇ hiyyenḍ, irde kurabe saba diryenḍ, irde al kurabe Al Kurunḍen dufay banare niṇ goyen ikala irke tagalyenḍ, irde kurabe naṇa hoyanḍe niṇ mere mat mere tiyyenḍ, irde al kurabe mere goyen tigiri teṇ miṇ bebak diryenḍ. Goyenḍe mata gwahade kurunḍ gobe denḍ sios tumṇaṇ sanḍiṇ heṇ heṇ ge teṇ hinayiṇ. ²⁷ Niṇḍeḍ al kura naṇa hoyanḍe niṇ mere mat mere tiye yeṇ nurdeḍ irawa ma karwo gwahade beleṇ po mere tinayiṇ. Al hoyanḍ kura sopte ma mere tiyyenḍ. Irde kura kame mere tinayiṇ. Wawunḍ unḍkurenḍe po tumṇaṇ mere titiṇ

ala ma tinayiņ. Be, gwaha teņ henjabe mere go tigiri teņ bebak dird dird al manañ hiyeņ. ²⁸ Munañ mere go tigiri titek al miņmoņ kenem mere go titek albe gabu irnayiņde gorbe balmiņ po hiyeņ. Irde yenya Al Kurunya po balmiņ mere teņ hiriryeņ.

²⁹ Be, porofet meteņ teņ teņ mata gobe al irawa ma karwo beleņ tagalnayiņ. Irke al hoyañbe meremiņ gobe fudinde Al Kurunya mere ma dahade goyen keņkela dufay henayiņ. ³⁰ Be, deņ gabu irde keperde hinayiņ bana goyen Al Kurun beleņ dufaymiņ banare niņ goyen al kura ikala irkeb huwarde tagaleņ tikeb al kura meheņde huwarde tagalde hiyeņ al gobe keperde balmiņ po hiyeņ. ³¹ Gwaha teņ hinayiņbe Al Kurunya mere banare hitiņ goyen tagaltek marbe tumņaņ tagalde hinayiņ. Gogab kadam saba gird teņ tumņaņ tareņ heņ hinayiņ. ³²⁻³⁴ Al Kurunbe dufay keņkela ma heņ mali mali mata ma teņ hiyen. Yenbe biņ kamke igiņ heņ heņ gote miņ al. Niņgeb Holi Spirityen tareņde porofet meteņ titek al gobe meteņ goyen igiņ mat doyaņ irde meteņ teņ hiyeņ.

Be, berebe Yesuyen alya bereya gabu irtiņ bana goņ henjabe mere ma teņ hinayiņ. Mata gobe Al Kurunya dirneņ weņ Yesuyen alya bereya beleņ gwaha teņ hanyen. Berebe Yesuyen alya bereya gabu irnayiņ bana goņ epte ma mere kawan tagalde hinayiņ. Gwaha titneņbe Moseyen sabare yitiņ gwahade po, Yesuyen alya bereyat doyaņ marte mere nurde gama po irde hinayiņ. ³⁵ Munañ mere ma mata kura goke gusuņaņ hiniņ

yeŋ nurdeb yamiŋde kuŋ gab uŋ yago gusuŋaŋ yirde hinayiŋ. Bere beleŋ Yesuyen alya bereya gabu irtinŋ diliŋ mar huwarde kawan po mere teŋ teŋ mata gobe memyak. ³⁶ Ga dinenŋ hime gabe deŋ Korin mar beleŋ, “Al Kurunyen merebe neŋ hitte mat forok yiriŋ,” yeŋ haŋyen, irde, “Al Kurunyen merebe neŋ muŋ po ga nurtinŋ,” yeŋ haŋyen yeke nurmiŋ geb, gago dinenŋ hime.

³⁷ Be, al kura yiŋgeŋ ge yeŋ, “Nebe porofet,” yeŋ nurde hi, irde kurabe, “Holi Spirityen saŋiŋde mata forok yeŋ yeŋ tareŋnem yaŋ,” yeŋ nurde hi kenem al gobe ne beleŋ deŋ hitte asaŋ ga kaŋ saba dirde hime gayenbe Doyaŋ Al Kurunyen mere tareŋ yeŋ nuryeŋ. ³⁸ Munanŋ al gore mere ga nurde ma nurhem nurhem teŋ wasak po teŋ hiyeŋbe Doyaŋ Al Kurunŋ wor gwahade po iryeŋ.

³⁹ Niŋgeb, kadne yago, Al Kurunyen mere basan heŋ tagalteŋ wor po nurde hinayiŋ. Irde naŋa hoyanŋde niŋ mere mat Al Kurunŋ mere ird ird mata goke utaŋ ma yirde hinayiŋ. ⁴⁰ Goyenpoga mata go teŋ henyabe hugiŋeŋ igiŋ mat mata teŋ hinayiŋ. Irde al mali mali huwarde hiburneŋ ma teŋ hinayiŋ.

15

Yesu kamiŋde mat huwaryiŋ

¹ Be, kadne yago, haŋkapyu Yesu niŋ yitiŋ mere igiŋ goke deŋ hitte tagaltiŋ goyen bitiŋ bak yeŋ yeŋ ge sopte momoŋ direŋ yeŋ nurde hime. Deŋbe mere igiŋ gayen nurde goke dufaytiŋ saŋiŋ yirtiŋ haŋ, irde mere go po gama irde tareŋ po huwarde haŋ. ² Niŋgeb mere igiŋ ne beleŋ deŋ

hitte tagalmirin goyen tarej po tanarde bada ma hej gama po irde hinayinbe mere igin go hende po sanj hej hike Al Kurun belen dumulgan tiyyen. Gwaha ma ten hinayinbe dufaytin yen ge tarej irtin gobe min minmon hiyyen.

³ Ga dinen hime gabe mere kurun Doyan Al Kurun belen momon nirtin goyen basan henbe momon dirmirin geb, gago sopte dinen hime. Mere gobe gahade: Yesu Kristube Al Kurunyen asande katin gwahade po, nende mata bulun nin ten kamyin. ⁴ Irke mete tiyamin. Gega Al Kurunyen asande katin gwahade po, kamyinde mat yerenkek hekeb huwaryin. ⁵ Irde Pita hitte forok yen gab Komatmin 12 hitte forok yirin. ⁶ Be, go kamereb wawun unkuende alya bereya 500 folek gwahade, yen gama irde hinhan mar dilinde forok yirin. Go mar goyen kurabe kaman gega, budambe han. ⁷ Be, Yesube mel go hitte forok yen gabe Yems hitte forok yirin. Irdeb mere basan marmen aposel tumnan hitte forok yirin. ⁸ Be, nen aposel hitte forok yen hinhin goyen ne hittebe funan wor po forok yirin. Nebe dirin kura kawan hen hen nalu hako hikeya kukuwamnen kawan hitin yara al kenkelak mon gega, ne hitte wor forok yeke delner kinmirin.

⁹ Nebe aposel gega, denne turnun yan mon. Goyenbe aposel hoyanbe denem turnun yan, ne folek wor po. Ningeb al hoyan belen ne gayen aposel nintek ma hime yen nurde hime. Gobe Al Kurunyen sios goyen bulun bulun yirde hin-hem geb, gago dinen hime. ¹⁰ Goyenpoga Al Kurun belen buninen nirde igin igin niryin geb,

gayenterbe al gahade hej metenminj tenj hime. Yen belej buninjen nirde iginj iginj niryinj gote iginenjbe kurunj wor po. Ninjeb nebe gogo yen ge tenj metenj kurunj wor po tenj hinhem. Aposel hoyanj belej metenj titinj gote folek wor po metenj tenj hinhem. Goyenbe nigen tarende ma metenj gwahade tenj hinhem. Al Kurunj belej buninjen nirde iginj iginj nirkeb gogo go hende huwarde metenj tenj hinhem. ¹¹ Ninjeb ne mananj, aposel hoyanj mananj tumnanj mere iginj goyen tagalde tukunj hinhet. Irke denj belej nurde mere iginj goke dufaytinj saninj iraminj.

Al kamtinjbe huwarnayinj

¹² Goyenpoga denj hanj bana goyen al kurabe mere iginj goyen bulunj mat tagalde hanj. Nenj belej Yesu Kristu kamyinje mat huwaryinj goke tagaltirinj gega, dahade ninjeb go mar gobe al kamtinjbe epte ma huwarnayinj yen hanj? ¹³ Al kamtinjbe epte ma huwartek manhan Yesu Kristu wor go ma huwarwonj. ¹⁴ Irde Yesu Kristu huwaryinj monj manhan goke tagalde hityen gobe minj minjmonj hewonj. Irde goke dufaytinj tarenj irtinj go wor minj minjmonj hewonj. ¹⁵ Irde al kamtinj sopte huward huward mata gam monj manhan Al Kurunj belej Yesu Kristu isanj ma hewonj. Goyenbe Al Kurunj belej Yesu Kristu isanj hirinj goke nenj belej tagalde hityen geb, metenj Al Kurunj belej ma tiyyinj goyen usi tenj al hoyanj momonj yirde hite yen nurtewonj. ¹⁶ Al kamtinj huwarnayinj monj manhan Yesu Kristu wor kamyinje mat ma po huwarwonj. ¹⁷ Irde

Yesu Kristu huwaryiñ mon manhan goke dufaytiñ tareñ irtin go wor miñ miñmon hewoñ. Irde gayenter wor mata buluñ bana po hiwoñ. ¹⁸ Irde yeñ ge dufaymiñ sañiñ irdeya ga kamtiñ mar wor mata buluñ bana po henya kamañ geb, Al Kurun hitte epte ma kuwoñ. ¹⁹ Yesu Kristu beleñ heñ heñniniñ igiñ ird ird gobe megen gar hitekeya po igiñ iryeñ yeñ goke doyañ heñ hityen manhan al bunineñ wor po hetewoñ. Irde al bunineñ megen gar hañ gote folek buluñ wor po hetewoñ.

²⁰ Goyenpoga Yesu Kristube kamtiñde mat huwardeb al kamtiñde mat kame huwarnayiñ kurun gote miñ al hiriñ geb, al kamtiñ mar goyen wor kame huwarnayiñ. ²¹ Al unkuereñ beleñ mata buluñ miñ urke kamde kamde mata forok yiriñ. Niñgeb gwahade goyen po, kamtiñde mat huward huward wor al unkuereñ beleñ miñ uryiñ. ²² Adam beleñ mata buluñ miñ uryiñ geb, yeñ kamere forok yitiñ marbe tumñañ kamde hanyen gwahade po, Yesu Kristu beleñ kamtiñde mat huwaryiñ geb, al hoyañ wor kamtiñde mat huwarnayiñ. ²³ Goyenbe kamtiñde mat mali mali ma huwarnayiñ. Yesu Kristube yeñ wa bikkeñ kamtiñde mat huwaryiñ. Be, kuñ kuñ yeñ sopte mulgañ heñ wañ wañ nalure alya bereyamiñ wor huwarnayiñ. ²⁴ Go kamereb nalu funañ wor po forok yiyen. Goya goyenbe Yesu Kristu beleñ Sanyen tarenya megen niñ doyañ marte tarenya tumñañ gwamuñ yuryen. Irdeb yeñ beleñ alya bereyamiñ doyañ yird yird mata goyen Nanin Al Kurun haniñde kiryen. ²⁵ Mata gobe gahade:

Yesu Kristu belen alya bereyamin doyan yirde hiyen. Irke kun kun Al Kurun belen Yesuyen asogom tumnan yukun Yesu kahan minde yerke yufurka tiyyen. ²⁶ Irdeb yen belen gwamun uryen det funanbe kamde kamde mata geb, mata goyen pasi wor po kiryen. ²⁷ Gobe, “Al Kurun belen det tumnan yende yufukde yerke doyan yirde hi,” yitin geb, gwaha po tiyyen. Be, “Det tumnan yende yufukde yerke” yitin mere gobe Al Kurun belen det tumnan yade Yesu Kristuyen yufukde yiryin geb, Al Kurun yingenbe Yesu Kristu yufukde ma hi gobe kenkela wor po nurde hite. ²⁸ Goyenpoga kame det tumnan Al Kurun belen Yesu Kristuyen yufukde yerde pasi iryen nalurebe Urmin Yesu Kristu wor gwaha iryen al Al Kurun yufuk bana hiyen. Gogab Al Kurun belen det kurun gate Doyan Al Kurun hen doyan yirde hiyen.

²⁹ Be, denbe al kamtin nin ten baptais ten hanjen. Goyenbe al kamtinbe ma huwarnayin yen nurde han kenem danin al katmin mar goke baptais ten ten mata ten hanjen? Al kamtinbe epte ma sopte huwarnayin kenem danin geb albe al kamtin mar goke ten baptais ten hanjen? ³⁰ Irde nenbe danin Yesu nin tenbe gise hanka mudunke kamtek kanduk yenen hityen? ³¹ Fudinde, kadne yago, ne hittebe gise hanka huginen kamde kamde mata forok yen hanjen gwahade yara, gise hanka kanduk yenen ulne misin katen himyen. Ga dinen hime gabe den tumnan Doyan Al Kuruninin Yesu Kristuya han goke amanen nurde himyen geb, gago momon

dird dird niŋ kama ma heŋ hime. ³² Ne gayen Efesus taunde niŋ mar kulu duwi yara gore buluŋ wor po nirke kanduk go fole ire yeŋ kurut yeŋ hinhem. Goyenbe dufay igiŋ moŋ megen gar po igiŋ heŋ heŋ ge dufay bener kerde gwaha timiriŋ manhan matane gore da igiŋ forok irde nunwoŋ? Hubu wor po. Al kamtiŋ epte ma sopte huwarnayiŋ kenem, “Gisebe kamtek. Niŋgeb dula teŋ kukuwa fe nene aman po hiniŋ,” yewen. ³³ Goyenbe gwahade moŋ geb, usi mere goyen fufinde yeŋ ma nurde hinayiŋ. Kadtiŋ kura mata buluŋ teŋ haŋ gore matatiŋya dufaytiŋya igiŋ goyen buluŋ yirnayiŋ geb, gago diniŋ hime. ³⁴ Niŋgeb keŋkela dufay heŋ mata buluŋ ma teŋ hinayiŋ. Deŋ haŋ bana al kurabe Al Kuruŋ keŋkela ma nurd unen haŋ. Mere ga dirde hime gabe merene gayen nurde memya henaŋ yeŋ gago diniŋ hime.

Al kamtiŋde mat huwarnayiŋ mar gote uliŋbe hoyan wor po henayiŋ

³⁵ Be, goyenbe deŋ haŋ bana al kura belen, “Al kamtiŋbe daha mat huwarnayiŋ? Irde huwardeb uliŋbe dahade henayiŋ?” yeŋ gusuŋaŋ heŋ haŋyen. ³⁶ Mere gwaha teŋ haŋ marbe kukuwamneŋ wor po! Deŋ belen det muykeŋ hartiŋ go ma kamyenbe gor mat dahadem det gergeŋ forok yiyyen? Epte moŋ. ³⁷ Det kura hare yeŋbe kame forok yiyyen pigiŋ yaŋ gwahade ma harde haŋyen. Det gote bilmiŋ, wit muykeŋ ma det hoyan harde haŋyen. ³⁸ Goyenpoga Al Kuruŋ belen muykeŋ gote pigiŋ forok yiwi yeŋ nuryen gwahade po forok yeŋ hiyen. Muykeŋ

yunƙuren yunƙuren gote piginbe hoyan hoyan po forok yirde hiyen ³⁹ Gwahade goyen po, det ulinbe tunande mon, hoyan hoyan. Alyenbe hoyan, megen nin dapɓa gote ulinbe hoyan, nuyenbe hoyan, irde fete nin dapɓa gote ulin wor hoyan. ⁴⁰ Irde nanƙinbe gor nin det minyan, irde megenbe gor nin det minyan. Goyenbe nanƙinde nin det buda gote umɓaminbe nende gigen hoyan hoyan, irde megen nin det buda gote umɓamin wor nende gigen hoyan hoyan po han. ⁴¹ Ningeb nana dilin gote umɓambe hoyan, irde gagasi gote umɓambe hoyan po. Dinambe han kurun go wor umɓambe nende gigen han.

⁴² Be, al kamtinde mat huwarnayin wor gwahade po ulinbe hoyan wor po henayin. Al ulin piginbe bida henayin gega, kamtinde mat huwarnayinbe huginɓen hinayin. ⁴³ Irde al hakwambe bida heɓ bulun henayin gega, huwarnayinbe ulin gob igin mun turnun yan henayin. ⁴⁴ Al kamke mete titek hakwam gobe ulin megen nin po gega, sopte huwarnayin gobe Al Kurunyen gasunde nin henayin.

Be, dilnininde yenen hite gayen ulin pigin minyan han kenem Al Kurunyen gasunde nin wor ulin pigin minyan han. ⁴⁵ Goke Al Kurunyen asande, “Hanƙarya wor po al tinɓen forok yirin gobe Adam. Yen hitte mat al fuful tiyyin,” yitin hi. Goyenpoga al hoyan Adam yara kame wor po forok yirin. Yenbe Yesu Kristu, Al Kurunya huginɓen heɓ heɓ goyen al yunen yunen gote min al hirin. ⁴⁶ Al Kurunyen gasunde nin ulinbe go wa ma forok yirin. Megen nin ulin wa forok

yeke gab Al Kurunyen gasunđe niŋ uliŋ gogo kame forok yiriŋ. ⁴⁷ Al haŋkapy a wor po forok yiriŋ gobe Al Kurun belen megen niŋ mulowo po yade forok iryiŋ. Gega al kame forok yiriŋ Yesu Kristube Al Kurunyen gasunđe mat forok yiriŋ. ⁴⁸ Adam uliŋbe megen mat forok yiriŋ gwahade po, megen haŋ marte uliŋbe Adamyen uliŋ gwahade miŋyaŋ haŋ. Gega al kura Yesu Kristuya haŋ marte uliŋbe kame kamtiŋde mat huwarde Al Kurunyen gasunđe haŋ mar gote uliŋ yara henayiŋ. ⁴⁹ Gayenterbe neŋ gayenbe megen niŋ al Adam yara hite. Gega kamebe Yesu Kristu Al Kurun hitte mat watiŋ gwahade hitek.

⁵⁰ Be, kadne yago, mere direŋ tihim gobe gahade: neŋ ulniŋiŋ megen po yirtiŋ gayen manan henyaŋbe epte ma nalu funaŋde Al Kurun belen alya bereyamiŋ doyaŋ yird yird bana goŋ hurkunayiŋ. Niŋgeb det buluŋ heŋ hubu hetek gore epte ma det hugiŋeŋ hitek bana goŋ hinayiŋ. ⁵¹ Niŋgeb mere banare hitiŋ goyen momoŋ direŋ tihim geb, keŋkela nurnaŋ ko. Merebe gahade: neŋ kurun gayen tumŋaŋ ma kamtekeya nalu funaŋ goyen forok yiyyeŋ. Kurabe kamnayiŋ, munaŋ kurabe go ma kamnayiŋ. Gega nalu goyenterbe kamnayiŋ marya go ma kamnayiŋ marya goyen tumŋaŋ ulniŋiŋ hoyan wor po henayiŋ. ⁵² Goyenterbe nalu funaŋde niŋ bigul mere tikeb goyare po ulniŋiŋbe hoyan wor po hiyyeŋ. Bigul go mere tikeb al kamtiŋ marbe huwarde uliŋ gobe sopte buluŋ ma heŋ hugiŋeŋ igiŋ po hinayiŋ. Irke neŋ kurabe ma kamdeya ulniŋiŋ hoyan hiyyeŋ. ⁵³ Gobe megen niŋ ulniŋiŋ

bida hetek gabe yubul tenj ulniniñ bida ma hetek goyen yawartek geb, gogo ulniniñ hoyañ hiyyen. Ulniniñ belneñ hitek gabe kame ulniniñ hugineñ hitek hiyyen. ⁵⁴ Ulniniñ bida hen belneñ po hitek goyen yubul tenj ulniniñ gergeñ bida ma hen hugineñ hitek goyen yawartek goke Al Kurunyen asañde katiñ mere gobe fudinde. Mere gobe gahade:

“Kamde kamde matabe hubu hiyun. Neñbe mata go fole irtin.” *Aisaia 25:8*

⁵⁵ “Kamde kamde mata, gebe epte ma fole dirayin.

Kamde kamde mata, gebe epte ma dakamayin,” *Hosea 13:14*

⁵⁶ Be, yitin gwahade po, kamde kamde gote kilibe mata bulun geb, mata bulun goreb al hitte kamde kamde forok iryin. Moseyen sababe al beleñ epte ma kenkela gama irtek geb, neñ al gayen mata bulun mar dineñ dineñ tareñbe sabare gor mat wañ hi. ⁵⁷ Goyenpoga neñbe Doyañ Al Kuruniniñ Yesu Kristuya hitekeb Al Kurun beleñ mata bulunya kamde kamdeya fole yird yird sanin duniñ geb, goke igin wor po nurd unen hite!

⁵⁸ Niñgeb, kadne yago, tareñ po hen yul ma yen hugineñ Doyañ Al Kurun nin meten tareñ po ten hinayin. Deñ beleñ Doyañ Al Kurun nin ten meten ten hugineñ kurut yen hanjen gobe dilinde min minmon ma hiyyen yen nurde han gogo.

16

Yesuyen alya bereya Yerusalem han goyen faran yurd yurd nin mere

¹ Be, Al Kurunyen alya bereya faran yurtek yen hora gabu ird ird nin gusunan niran goke wol hej momon diren tihim. Ne beley Galesia nanare nin Yesuyen alya bereya goyen gwaha gwaha tinayin yinmeke tiyamin gwahade goyen po, den wor mata gwahade po tinayin. ² Ningeb meten ten gote murungem hora yadeb kura pota yirde Sandemin Sandemin yawan gabu yirde hinayin. Hora kurun ten han marbe kurun pota yirde hinayin, munan hora dirnen yade han marbe dirnen pota yirde yawan gabu yirde hinayin. Gogab den hitte kumeke goyare po gab hora gabu yirnin yirnin ma ten hinayin. ³ Be, ne kun forok yemekeb Yerusalem nin sios yuntek hora goyen yen beley ga yukun yunnayin yen al kura yawarnayin. Irkeb ne beley mel gobe al gwahade yen Yerusalem mar nin asan kayen goyen manan yunmeke gab ten kunayin. ⁴ Irde ne wor mel goya tumnan kutek gobe min minyan kenem neya tumnan kutek.

Korin kun kun nin tagalyin

⁵ Be, nebe Masedonia nana beley kun kun nin dufay hej himyen geb, bana gore mat kun kun gab den hitte kwen. ⁶ Kun denya ulyande yara hini yen nurde hime. Irde mene huwarde nana bulun hiyyen nalure goyen manan gor po hej wet yen nurde hime. Go kamere gab gon kura kwe yen nuren goyen faran nurke kwen. ⁷ Gobe dulin kun denman kun kun nin ma nirde hikeb gago dinen hime. Doyan Al Kurunyen dufay kenem denya ulyande yara hitek yen nurde hime. ⁸⁻⁹ Goyenpoga Efesus taunde garbe Al Kurunyen

meten kurun kenkela meten titek goyen forok yen hi geb, gar hen meten ten Pentekos nalu heke gab den hitte kwen. Garbe al budam Al Kurunyen mere fudinde yen nurde han. Goyenbe budambe asogo nirde han.

¹⁰ Be, Timotibe den hitte kuyen. Ningeb den belen kenkela faran urde hikeb denya hen hen ge kafura ma hiyyen. Yen wor ne ten hime yara Doyan Al Kurunyen meten ten kun hi. ¹¹ Ningeb palap po irde hinayin. Irde yen belen ne hitte mulgan hen wan wan nalurebe hantin yerde unen guram irde taren irdeb tubul tike bin kamkeya wayyen. Nebe Timoti goyen gor nin Yesu nurd untin mar kura goya wanayin yen doyan hen hime.

¹² Be, kadne Apolosbe kadomya den hitte kunayin yen inen teban irde himyen gega, kutek ma irde hiyen. Goyenbe kutek nalu kura forok yeke gab kuyen.

¹³ Be, denbe kenkela hen ga hinayin. Irde Doyan Al Kurun nin hekken nurdeya hinayin. Irde kafura ma hen taren po hen hinayin. ¹⁴ Irde meten ten hinayin kurun gobe bitinde huginen al hoyan nin amanen nurd nurd dufay goyen hikeya ga meten ten hinayin.

¹⁵ Be, denbe Akaia nanja bana gon nin albe Stefanasya yenya hanjen marya gore wa Yesu nin dufaymin sanin irdeb Al Kurunyen alya bereya hoyan faran yurd yurd meten goyen tinin yen nurde meten ten hanjen gobe nurde han gogo. Ningeb, kadne yago, denbe ¹⁶ mel goyen tumnan palap yirde hinayin. Irde al kura yen meten

teŋ hanŋen gwahade meten teŋ hike yenenbe go wor palap yirde hinayin. ¹⁷ Nebe Stefanasya Fotunatusyabe Akaikusya wake neya hite goke amanen nurde hime. Deŋ denmewon wor po yeŋ nurde himyen goyenpoga, mel ga waŋ forok yekeb tumŋan denhem yara nurdeb aman hen hime. ¹⁸ Yenbe denya hen faran durde hike bitin kamke hinhan gwahade goyen po, waŋ gar ne wor gwahade po nirde han. Niŋgeb denbe al gwahade goyen palap yirde hinayin.

Mere funan

¹⁹ Be, Esia* naŋa bana nin sios neya hite mar beŋ den ge dufay hen han goyen momon yirayin ninkeb gago dinen hime. Irde Akwilaya berem Prisilayabe yaminde gabu irde Doyan Al Kurun dolon irde han marya beŋ wor den ge ug po dufay hen han geb, gago bebak dirde hime. ²⁰ Irde Yesu nurd untiŋ mar hoyan gar han wor tumŋan den ge dufay hen han geb, gago momon dirde hime. Denbe kadom gargar gird ten henyabe bitin bana mat fudinde wor po kadom gargar girde ten hinayin. Gobe Al Kurun dilinde wukkeŋ wor po geb.

²¹ Be, funanbe nigen hanner wor po denne gahade kan asan ga pasi iren tihim – POL.

²² Be, al kura Doyan Al Kurun nin amanen ma nurd unen han marbe Al Kurun beŋ karan yurke bulun wor po henayin. Doyan Al Kuruninin, aranen wayayin!

* **16:19:** Esia naŋa gobe gayenter nin Esia naŋa kurun goke ma yitiŋ. Gayenterbe Turki inen hanŋen.

²³ Be, Doyaŋ Al Kurun Yesu beley buniŋen dirde
igin igin dirwon yen nurde hime.

²⁴ Neya denyabe Yesu Kristuya tumŋan hite
geb, den ge amanen wor po nurd dunen hime.
Fudinde wor po. Gogo po.

**Al Kurunyen Mere Igin
The New Testament in the Gwahatike Language of
Papua New Guinea
Nupela Testamen long tok ples Gwahatike long
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

PDF generated using Haiola and XeLaTeX on 11 Nov 2022 from source files dated 9 Oct 2020

dbba218f-41f3-5f08-b0b6-2a7c919093ab